

錢考功集卷第一

五言古詩

東陽郡齋中詒南山招韋十

霽來海畔山隱映城上起中峰落照時殘雪
翠微裏同心久爲別孤興那對此良會何遲
遲清陽瞻則爾

青泥驛迎獻王侍御

侯館掃清晝使車出明光森森入郭樹一道
引飛霜仰視駉花白多慙綬色黃鷓鴣無羽

翼願假憲鳥翔

沐陽古渡作

日落問津處雲霞殘碧空牧牛避田燒退鷁
隨潮風回首故鄉遠臨流北路窮翩翩青真
去羨彼高飛鴻

卧疾荅劉道士

白露蛩已急空林日淒清寥寥畫扉掩獨卧
愁窓明寶字比仙藥羽人寄柴荆長吟想風
馭况若升蓬瀛

夢尋西山準上人

別處秋泉聲至今猶在耳何嘗夢魂去不見
雪山子新月隔林時千燈翠微裏言忘心更
寂跡滅雲自起覺來纓上塵如洗功德水

長安旅宿

九秋旅夜長萬感何時歇蕙花漸寒暮心事
猶楚越直躬遭世道咫尺隔天闕每聞長樂
鍾載泣靈臺月明旦北門外歸途堪白髮

過桐栢山

秋風過楚山山靜秋聲晚賞心無定極僊步
亦清遠反照雲竇空寒流石苔淺羽人昔已
去靈跡欣方踐投策謝歸途世緣從此遣

李士曹廳對雨

春雨暗重城訟庭深更寂終朝入吏少滿院
煙雲積濕鳥厭花枝新苔宜砌石掾曹富文
吏清興對詞客愛爾蕙蘭蕙芳香飽時澤

登勝果寺南樓雨中望嚴協律

微雨侵晚陽連山半藏碧林端陟香樹雲外

遲來客孤村凝片煙去水生遠白但佳川原
趣不覺城池夕更喜眼中人清光漸咫尺

冬夜題旅館

退飛憶林藪樂業羨黎庶四海盡窮途一枝
無宿處嚴冬北風急中夜哀鴻去孤燭思何
深寒窓坐難曙勞歌待明發惆悵盈百慮

自終南山晚歸

采苓日往還得性非樵隱白水到初闕青山
辭尚近絕境勝無倪歸途興不盡沮溺時反

顧牛羊自相引逍遙不外求塵慮從茲泯

早渡伊川見舊作

鷗鷄鳴曙霜秋水寒旅涉漁人昔隣舍相見
具舟楫出浦興未盡向山心更愜村落通白
雲茅茨隱紅葉東臬滿時稼歸客欣復業

夕發箭場巖下作

行役不遑安在幽機轉發山谷無明晦溪霞
自興沒朝櫛杉下風夕飲石上月懿爾青雲
士垂纓朝鳳闕寧知採竹人每食慙薇蕨

同李五夕次香山精舍訪憲上人

彼岸聞山鍾仙舟過苦水松門入幽映石徑
趨迤邐初月開草堂遠公方覲止忘言在閑
夜凝念得微理泠泠功德池相與滌心耳

雨中望海上灑鬱林觀中道作

山觀海頭雨懸森動煙樹只疑蒼茫裏鬱鳥
欲飛去大塊怒天具驚潮蕩雲路群真儼盈
想一葦不可渡惆悵赤城期願假輕鴻馭

廣德初鑾駕出關後登高愁望二首

鍾云清和厚遠
不待此而知
詩中尚有佳三
詠

長安不可望望處邊愁起輦轂混戎夷山河
空表裏黃雲壓城闕斜照移烽壘漢幟遠成
霞胡馬來如蟻不知涿鹿戰早晚蚩尤死渴
日候河清沉憂催暮齒
愁看秦川色慘慘雲景晦乾坤暫運行品物
遺覆載黃塵漲戎馬紫氣隨龍旆掩泣指關
東日月祆氛外臣心寄遠水朝海去如帶周
德更休明天衢佇開泰

過曹鈞隱者

荃蕙有其性馨香道爲人不居衆芳下寧老
空林春之子秉高節攻文還守真素書寸陰
盡流水怨情新濟濟振纓客煙霄各致身誰
當舉玄晏不使作良臣

獨住覆釜寄郎士元

賞心無遠近芳月好登望勝事引幽人山下
復山上將尋洞中藥復愛湖外嶂古壁苔入
雲陰溪樹穿浪誰言世緣絕更惜知音曠鶯
啼綠蘿春迴首還惆悵

送王季友赴洪州幕下

列郡皆周武南征所從誰諸侯重才略見子
如瓊枝撫劔感知已出門方遠辭煙波帶幕
府海日生紅旗問我何功德負恩留玉墀銷
魂把別袂愧爾酬明時

客舍贈鄭賁

結交意不薄匪席言莫違世義隨波久人生
知己稀先鳴誓相達未遇還相依一望金門
詔三看黃鳥飛暝投同旅食朝出易儒衣嵇

向林廬接携手行將歸

山中春仲寄汝上王恒穎川沈冲

隱者守恬泊春山日深靜誰知蟠木材得性
無人境座隅泉出洞竹上雲起嶺飢狔入山
厨飲虹過藥井前溪堪放逸仲月好風景遊
目來遠思摘芳寄汝穎

南中春思

入仕無知言遊方隨世道平生願開濟遇物
平懷抱已阻青雲期甘同散樗老客遊南海

曲坐見韶陽蚤舊國別佳人他鄉思芳草惜
無鴻鵠翅安得凌蒼昊

東陵藥堂寄張道士

木落蒼山空當軒秋水色清旦振衣坐永吟
意何極願言金丹壽一假鸞鳳翼日夕開真
經言忘心更默玄都有仙子採藥早相識煙
霞難再期焚香空歎息

苦雨憶皇甫冉

涼雨門巷深窮居成習靜獨吟愁霖雨更使

秋思未疲痾苦昏墊日夕開軒屏草木森已
悲衾幘清且冷如何遊宦客江海隨泛梗延
首長相思憂襟孰能整

寄任山人

天階崇黼黻世路有趨競獨抱中孚爻誰知
苦寒詠行潦難朝海散材空遇聖豈無鳴鳳
時其如問津命所思青山郭再夢綠蘿逕林
泉春可遊羨爾得真性

登秦嶺半巖遇雨

屏翳忽騰氣浮陽慘無暉千峰掛飛雨百尺
搖翠微震電閃雲逕奔流翻石磯倚巖假松
蓋臨水羨荷衣不得采苓去空思乘月歸且
憐東臯上黍色侵荆扉

杪秋南山西峯題隼上人蘭若

向山看霽色步步豁幽性反照亂流明寒空
千嶂淨石門有餘好霞殘月欲映上詣遠公
廬孤峰懸一徑雲裏隔窓火松間下山磬客
到兩忘言猿心與禪定

田園雨後贈鄰人

安排常任性偃卧晚開戶樵客荷簑歸向來
春山雨殘雲虹未落反景霞初吐時鳥鳴村
墟新泉遶林圃堯年尚恬泊隣里成太古室
邇人遂遙相思怨芳杜

天門谷題孫逸人石壁

崖口亂流處竹深斜照歸主人卧蟠石心耳
滌清暉春雷近作解空谷半芳菲雲棟綵虹
宿藥圃蝴蝶飛惡囂慕嘉遁幾夜瞻少微相

見竟何說忘情同息機

藍溪休沐寄趙八給事

蟲鳴歸舊里田野秋農閑
即事敦夙尚衡門方再關
夕陽入東籬爽氣高前山
霜蕙後時老巢禽知暝還
侍臣黃樞寵鳴玉青雲間
肯想觀魚處寒泉照髮斑

遊朝川至南山寄谷口王十六

山色不厭遠我行隨趣深
蹟幽青蘿徑思絕秋霞岑
獨鶴引過浦鳴猿呼入林
褰裳百泉

裏一步一清心王子在何處
隔雲鷄犬音折麻定延佇
乘月明招尋

藍田溪與漁者宿

獨遊屢忘歸况此隱淪處
濯髮清泠泉月明不能去
更憐垂綸叟靜若沙上鷺
一論白雲心千里滄洲趣
蘆中夜火盡浦口秋山曙
歎惜分枝禽何時更相遇

淮上別范大

悲風墮涼葉送歸怨南楚
窮年將別離寸晷

仲宴語長淮流不息征棹忽復舉碧落半愁
雲黃鶴時顧侶遊宦且未達前途各脩阻分
袂一相嗟良辰更何許

離居夜雨奉寄李京兆

永夜不可度蛩吟秋雨滴寂寞想章臺始歎
雲泥隔雷聲匪君車猶時過我廬電影非君
燭猶能明我目如何瓊樹枝夢裏首不足望
望佳期阻愁生寒草綠

嘆畢少府以持法無隱見繫

用法本禁邪盡心翻自極畢公在囹圄世事
何糺纏翠鳳呈其瑞虞羅寄鑿翼囚中千念
時窓外百花色落景閉園扉春蟲網叢棘古
人不念文紛淚莫沾臆

小園招隱

支離鮮兄弟形影如手足但遂飲水節甘辭
代耕祿班衣在林巷始覺無羈束交柯低戶
陰閒鳥將雛宿窮通世情阻日夜苔徑綠誰
言北郭貧能分晏嬰粟

過温逸人舊居

反真難合道懷舊仍無弔浮俗漸澆漓斯人
誰繼妙聲容在心耳寧覺阻言笑玄堂閉幾
春拱木齊雲嶠鶴傳居士舞猿得蘇門嘯酌
酒片陽微空山想埋照

縣內水亭晨興聽訟

晨光起宿鷺池上判黎甞借問秋泉色何如
拙宦情磨鉛辱利用策蹇愁前程昨夜明月
滿中心如鵲驚負恩時易失多病績難成坐

惜寒堂晚霜風吹杜衡

酬王維春夜竹亭贈別

山月隨客來主人興不淺今宵竹林下誰覺
花源遠惆悵曙鶯啼孤雲還絕巘

送張少府

愁雲破斜照別酌勸行子蓬驚馬首風鴈拂
天邊水寸晷如三歲離心在萬里

送楊著作歸東海

楊柳出關色東行千里期酒酣暫輕別路遠

始相思欲識離心盡斜陽到海時

送李協律還東京

芳草忽無色王孫復入關長河侵驛道匹馬
傍雲山愁見離居夕螢飛秋月閑

秋館言懷

蟋蟀已秋思蕙蘭仍碧滋蹉跎獻賦客歎息
此良時日夕雲臺下商歌空自悲

和劉明府宴縣前山亭

城隅勞心處雪後歲芳開山映千花出泉經

萬井來翔鸞欲下舞上客且留杯

新雨喜得王卿書問

苦雨暗秋徑寒花垂紫苔愁中綠罇盡夢裏
故人來果有相思字銀鈎新月開

賦得巢燕送客

能棲杏梁際不與黃雀群夜影寄紅燭朝飛
高碧雲含情別故侶花月惜春分

白石枕并序

起與監察御史畢公耀交之厚矣頃於藍水

得片石皎然霜明如其德也許爲枕贈之及
琢磨將成炎暑已謝俗曰此猶班女之扇可
退也君子曰不然此真畢公之佳賞也故珍
而賦之
琢珉勝水碧所貴素且貞曾無白圭玷不作
浮磬鳴捧來太陽前一片新冰清沉沉風憲
地待爾秋已至璞堅難爲功誰怨晚成器比
德無磷緇論交亦如此
錢考功集卷第一

錢考功集卷第二

五言古詩

海畔秋思

匡濟難道合去留隨興牽偶爲謝客事不顧
平子田魏闕賁翹楚此身長棄捐箕裘空在
念拙拙誰推賢無用即明代養痾仍壯年日
夕望佳期帝鄉路幾千秋風晨夜起零落愁
芳筌

太子李舍人城東別業

南山轉群木昏曉擁山翠小澤近龍居青蒼
常雨氣君家北原上千金買勝事丹闕退朝
迴白雲迎賞至新晴村落外處處煙景異片
水明新崖餘霞入古寺東臬指歸翼月盡有
餘意

谷口新居寄同省朋故

種黍傍煙溪榛荒兼沮洳亦知生計薄所貴
隱身處橡栗石上林莓苔水中路蕭然授衣
日得此還山趣汲井愛秋泉結茆因古樹閑

雲與幽鳥對我不能去寄謝鴛鴦群狎鷗拙
所慕

京兆尹廳前甘棠樹降甘露

內史用堯意理京宣惠慈氣和祥則降孰謂
天難知濟旱露為兆有如填應箎豈無天桃
樹灑此甘棠枝玉色與人淨珠光臨筆垂協
風與之俱物性皆熙熙何必鳳池上方看作
霖時

秋夜作

萬計各無成寸心日悠漫浮生竟何窮巧曆
不能筭流落四海間辛勤百年半商歌向秋
月哀韻兼浩嘆寤寐怨佳期美人隔霄漢寒
雲度窮水別業遶垂幔窓中問談鷄長夜何
時旦

觀村人牧山田

六府且未盈三農爭務作貧民乏井稅瘠土
皆墾鑿禾黍入寒雲茫茫半山郭秋來積霖
雨霜降方鉅獲中田聚黎甿反景空村落顧

慙不耕者微祿同衛鶴庶追周任言敢負謝
生諾

裴侍郎湘川廻以青竹筒相遺因而
贈之

楚竹青玉潤從來湘水陰緘書取直節君子
知虛心入用隨憲簡積文不受金體將丹鳳
直色映清霜深寧肯假伶倫謬為龍鳳吟唯
將翰苑客昔祕瑤華音長跪捧嘉貺歲寒慙
所欽

東城初陷與薛員外王補闕暝投南

山佛寺

日具石門裏松聲山寺寒香雲空靜影定水
無驚湍洗足解塵纓忽覺天形寬清鍾揚虛
谷微月深重巒噫我朝露世翻浮與波瀾行
運遘憂患何緣親盤桓庶將鏡中象盡作無
生觀

奉和張荊州巡農晚望

太清霽雲雷陽春陶物象明牧行春令仁風

助昇長時和俗勤業播殖農厥壤陰陰桑陌
連漠漠水田廣郡中忽無事方外還獨往日
暮駐歸軒湖山有佳賞宣城傳逸韻千載誰
此響

送包何東遊

水國嘗獨往送君還念茲湖山遠近色昏旦
煙霞時子好謝公跡常吟孤嶼詩果乘扁舟
去若與白鷗期野趣及春好客遊欣此辭入
雲投館僻采碧過帆遲江上日迴首琴中勞

別思春鴻刷歸翼一寄杜蘅枝

酬陶六辭秩歸舊居見簡

靜節昔高尚令孫嗣清微舊廬雲峰下獻歲
車騎歸去俗因解纓憶山得采薇田疇春事
起里巷相尋稀淵明醉乘興閒門祗掩扉花
禽驚曙月鄰女上鳴機畢娶願已果養恬志
寧違吾當掛朝服同爾緝荷衣

奉使採箭籐竹谷中晨興赴嶺

孤客倦夜坐聞猿乘早發背溪已斜漢登棧

尚殘月重峰轉森爽幽步更超越雲木聳鶴
巢風蘿掃虎穴人群徒自遠世役終難歇入
山非買山采竹異采蕨誰見子牟意怕勞書
魏闕

同嚴逸人東溪泛舟

子陵江海心高跡此閒放漁舟在溪水曾是
敦風尚朝霽收雲物垂綸獨清曠寒花古岸
傍唳鶴晴砂上紛吾好真逸不遠來相訪已
接方外遊仍陪郢中唱歡言盡佳酌高興延

秋望日暮浩歌還紅霞亂青嶂

過沈氏山居

雞鳴孤煙起靜者能卜築喬木出雲心閑門
掩山腹貧交喜相見把臂歡不足空宴
言求日清耳目泉聲冷樽俎荷氣香童僕往
往仙犬鳴樵人度深竹酒酣出谷口世網何
羈束始願今不從區區折腰祿

贈栢巖老人

日與麋鹿群賢哉買山叟龐眉忽相見避世

一何久林栖占崖曲舒事佳春後瓠葉覆荆
扉粟苞垂甕牖獨歌還獨酌不耕亦不耦
田隔雲溪多雨長根莠煙霞得情性身世同
芻狗寄謝營道人天真此翁有

送薛判官赴蜀

橫吹聲轉悲羽觴酣欲別舉目叩關遠離心
不可說邊陲勞帝念日下降才傑路極巴水
長天銜劒峰缺單車動夙夜越境正炎節星
橋過客稀火片蒸雲熱陰符能制勝千里在

坐决始見儒者雄長纓繫餘孽

詔許昌崔明府拜補闕

儒者久營道詔書方問賢至精一耀世高步
誰同年何樹可棲鳳高梧枝拂天脫身鳧鷖
裏載筆虎圍前日月傳軒后衣冠真列仙則
知驪龍珠不祕清冷泉才子貴難見郢歌空
復傳惜哉効頻客心想勞婢媵

仲春晚尋覆釜山

蝴蝶弄和風飛花不知晚王孫尋芳草步步

忘路遠况我愛青山涉趣皆遊踐縈迴必中
路陰晦陽復顯古岸生新泉霞峯映雪巘交
枝花色異竒石雲根淺碧洞志忘歸紫芝行
可搴方嗤嵇叔夜林卧方沉湎

贈鄰東鄭少府

一聞白雪唱願見清陽久誰爲結綬來得陪
趨府後小邑藍溪上卑棲愜所偶忘言復連
墻片月亦携手草色同春徑鶯聲共高柳美
景百花時平生一盞酒聖朝法天地以我爲

芻狗秩滿歸白雲期君訪谷口

謝張法曹萬頃小山暇景見憶

樂道隨去處養和解朝簪茅堂近丹闕佳致
一何深退食不趨府忘機還在林清風亂流
上未日小山陰解籜雨中竹將雛花際禽物
華對幽寂絃酌兼詠吟自昔仰高步及茲勞
所欽郢歌叨繼組知己復知音

罷章陵令山居過中峰道者二首

寧辭園令秩不改淵明調解印無與言見山

始一笑幽人還絕境誰道苦奔峭隨雲剩渡
溪出門更垂釣吾廬青霞裏窓樹玄猿嘯微
月清風來方知散髮妙

丘壑趣如此暮年始棲偃賴遇無心雲不笑
歸來晚鳴鳩拂紅枝初服傍清畎昨日山僧
來猶嫌嘉道淺託君紫陽家路滅心更遠睇
雲創其居抱犢上絕巘杏田溪一曲霞徑峰
幾轉跋石揖飛泉謝公應在眼願言携手去
採藥長不返

登覆釜山遇道人二首

晨策趣無涯，名山深轉秀。三休變覆景，萬轉迷宇宙。攀崖到天窓，入洞窮玉溜。側徑蹲恠石，飛蘿擲驚狎。花間鍊藥人，鷄犬和乳竇。散髮便迎客，采芝仍滿袖。郭璞賦遊仙，始願今可就。

真氣重嶂裏，知君嘉遁幽。山階壓丹穴，藥井通洑流。道者帶經出，洞中攜我遊。欲驂白蜺去，且爲紫芝留。勿憶武陵事，別家疑數秋。

尋華山雲臺觀道士

秋日西山明，勝趣引孤策。桃源數曲盡，洞口兩岸折。還從罔象來，忽得仙靈宅。霓裳誰之子，霞酌能止客。殘陽在翠微，携手更登歷。林行拂煙雨，溪望亂金碧。飛鳥下天窓，裊松際雲壁。稍尋玄蹤遠，宛入寥天寂。願言葛仙翁，終年鍊玉液。

海上卧疾寄王臨

離客窮海陰，蕭辰歸思結。一隨浮雲滯，幾恣

黃鵠別妙年，沉疴生事多。所闕劔中負，明
義枕上惜。玄髮之子良，史才華簪偶。時哲相
思千里道，愁望飛鳥絕。歲暮冰雪寒，淮湖不
可越。百年去心慮，孤影守薄劣。獨餘慕侶情，
金石無休歇。

登玉山諸峯偶至悟真寺

郭南雲水佳，訟簡野情發。紫芝每相引，黃綬
不能謀。稍入石門幽，始知靈境絕。冥搜未寸
畧，仙經俄九折。蟠木蓋石梁，崩崖露雲穴。數

峯拔崑嶠，秀色與空澈。玉氣交晴虹，桂花留
曙月。半巖採珉者，一點如片雪。真賞無前程，
竒觀寧暫輟。更聞東林磬，可聽不可說。興中
尋覺花寂爾，諸象滅。

長安客舍贈李行父明府

藏器偶時少，知人自古難。遂令丹穴鳳，晚食
金琅玕。誰謂兵戈際，噓琴方一彈。理煩善用
簡，濟猛能兼寬。夙夜念黎庶，寢興非宴安。洪
波未靜壑，何樹不驚鸞。鳧舄傍京輦，眊心懸

灌壇高槐暗苦雨長劍生秋寒旅食還時客
飢年亦盡歡親勞攜斗水徃徃救泥蟠但恐
酬明義蹉跎芳歲闌

美楊侍御清文見示

伯牙道喪來絃絕無人續誰知絕唱後更有
難和曲層峰與清流逸勢競奔感清文不出
戶仿佛皆在目霧雪看滿懷蘭空坐盈綯孤
光碧潭月一片崑崙玉初見歌陽春韶光變
枯木再見吟白雪便覺雲蕭蕭則知造化源

方寸能展縮斯文不易遇清爽心豈足願言
書諸紳可以爲佩服

山居新種花藥與道士同遊賦詩

自樂魚鳥性寧求農牧資淺深愛巖壑疏鑿
盡幽奇雨花相助好鶯鳴春草時種蘭入山
翠引葛上花枝風露折紅紫綠溪復映池新
泉香杜若片石隱江籬宛謂武陵洞潛應造
化移杖策攜煙客滿袖撥芳蕤蝴蝶舞留我
仙雞間傍籬但令黃精熟不慮韶光遲笑指

雲蘿徑樵人那得知

初黃綬赴藍田縣作

蟠木無匠伯終年棄山樊苦心非良知安得
入君門忽忝英達顧寧窺造化恩螢光起腐
草雲翼騰沉鯤片石世何用良工心所存一
叨尉京甸三省慙黎元賢尹止趨府僕夫儼
歸軒眼中縣胥色耳裏蒼生言居人散山水
即境真桃源鹿聚入田逕鷄鳴隔嶺村食和
俗久清到邑政空論且嘉訟庭寂前階滿芳

蓀

歸義寺題震上人壁

入谷逢雨花香綠引幽步招提繞泉石萬轉
同一趣向背森碧峯淺深羅古樹堯皇未登
極此地曾隱霧祕識得神謀因高思虎路太
陽忽臨照物象俄光煦梵王宮始開長者金
先布白水入禪境礪山通覺路徃徃無心雲
猶起潛龍處仍聞七祖後佛子繼調御溪馬
投薰燈山蟬飽甘露不作解纓客寧知捨筏

喻身世已悟空歸途復何去

送李四擢第歸覲省

當年貴得意文事各爭名獨唱陽春曲唯君
金玉聲懸黎寶中出高價世難掩鴻羽不低
飛龍津徒自險直矜鸚鵡賦不貴芳桂枝少
俊蔡邕許長鳴唐舉知梁城下熊軾朱戟何
曄耀才子欲歸寧棠花已含笑門高知慶大
子孝覺親榮獨攬還珠美寧唯問綰情離筵
不盡醉慘袂一何早馬蹄西別輕樹色東看

好行塵忽不見惆悵青門道

卧病李員外題扉而去

僻陋病者居蒿萊行徑失誰知簪紱貴能問
幽憂疾珂聲未駐門蘭氣先入室沉疴不冠
帶安得候蓬華清陽去莫尋離念頃來侵崔
栖高窓靜日出脩桐陰枕上憶君子悄悄唯
苦心

送李大夫赴廣州

一賢間氣生麟趾鳳凰羽何意人之望未為

王者輔出鎮忽推才盛哉文且武南越寄維
城雄雄擁甲兵鼓門通幕府天井入軍營厥
俗多豪侈古來難致禮唯君飲冰心可酌貪
泉水忠臣感聖君徇義不邀勲龍鏡逃山魅
霜嵐破嶂雲征途凡幾轉魏闕終在眼向郡
海潮迎指鄉關樹遠按節化甌閩下車佳政
新應令尉佗俗還作上皇人支離交俊哲弱
冠至華髮昔許霄漢期今嗟鵬鷄別圖南不
可御惆悵守薄劣

錢考功集卷第二

錢考功集卷第三

七言古詩

紫參歌并序

紫參幽芳也五莖連蔓狀飛禽羽舉俗名之
五馬花起故山道人蘭若尤豐此藥校書劉
公詠歌之俾予繼組

遠公林下滿青苔春藥偏宜間石開往往幽
人尋水見時時僊蝶隔雲來陰陽雕刻花如
鳥對鳳連雞一何小春風宛轉虎溪傍紫翼

紅翹翻霽光，貝葉經前無住色。蓮花會裏暫
留香，蓬山才子憐幽性。白雪陽春動新詠，應
知仙卉老雲霞。莫賞夭桃滿蹊徑。

瑪瑙杯歌

瑤溪碧岬生奇寶，剖質披心出文藻。良工雕
飾明且鮮，得成珍器入芳筵。含華炳麗金罇
倒，翠竿瓊觴忽無色。繁絃急管催獻酬，倏若
飛空生羽翼。瓊瓊蘭英照豹斑，滿堂詞客盡
朱顏。花光來去傳香袖，霞影高低傍玉山。王

孫彩筆題新詠，碎錦連珠復輝映。世情貴耳
不貴奇，謾說海底珊瑚枝。寧及琢磨當妙用，
燕歌楚舞長相隨。

鋤藥詠

時藥穿林復在巘，濃香秀色深能淺。雲氣垂
來，露偏松陰古處知。春晚拂曙殘鷺百轉，
催紫泉帶石幾花開。不隨飛鳥緣枝去，如笑
幽人出谷來。對之不覺忘踈懶，廢卷荷鋤嫌
日短。豈無萱草樹堦墀，惜爾幽芳世所遺。但

使芝蘭出蕭艾不辭手足皆胼胝寧學陶潛
空嗜酒頽齡捨此事東菑

病鶴篇

獨鶴聲哀羽摧折沙頭一點雪殘雪三山仙
侶能遠翔五里徘徊忍爲別驚群各畏野人
機誰肯相將霞外飛不及洲鳧長比翼隨波
雙泛復雙歸碧海滄江深且廣日盡天倪安
得往雲山隔路不隔心宛頸和鳴長在想何
時白霧卷青天接影追飛太液前

片玉篇

至寶未爲代所奇韞靈示璞荆山垂獨使虹
光天子識不將清韻世人知世人所貴惟燕
石美玉對之成瓦礫空山埋照凡幾年古色
蒼痕宛自然重溪冪冪暗雲樹一片熒熒光
石泉美人之鑒明且徹玉指提攜歎竒絕試
勞香袖拂莓苔不覺清心皎冰雪連城美價
幸逢時命代良工豈見遺試作珪璋禮天地
何如璫璣在堦墀

畫鶴篇

點素凝姿任畫工霜毛玉羽照簾櫳借問飛
鳴華表上何如粉纈彩屏中文昌官近芙蓉
闕蘭室氤氳香且結鑪氣朝成緱嶺雲銀燈
夜作華亭月日暖花明梁燕歸應驚片雪在
仙闈主人顧盼千金重誰肯徘徊五里飛

秋霖曲

君不見聖主旰食憂元元秋風苦雨暗九門
鳳凰池裏沸泉騰蒼龍闕下生雲根陰精離

畢太淹度倦鳥將歸不知樹愁陰慘淡時殷
雷生靈墊溺若寒灰公卿紅粒爨丹桂黔首
白骨封青苔貂裘玉食張公子魚炙熏天戟
門裏且如歌笑日揮金應笑禹湯能罪已鶴
鳴蛙躍正其時豹隱蘭凋亦可悲焉得太阿
決屏翳還令率土見朝曦

賦得青城山歌送楊杜二郎中赴蜀

軍

蜀山西南千萬重仙經最說青城峯青城嶽

岑倚空碧遠壓峨眉吞劔壁錦屏雲起易成
霞玉洞花明不知夕星臺二妙逐王師阮瑀
軍書王粲詩日落猿聲連玉笛晴來山翠傍
旌旗綠蘿春月營門近知君對酒遙相思

送崔校書從軍

鴈門太守能愛賢麟閣書生亦投筆寧惟玉
劔報知己更有龍韜佐師律別馬連嘶出御
溝家人幾夜望刀頭燕南春草傷心色薊北
黃雲滿眼愁聞道輕生能擊虜何嗟少壯不

封侯

送張將軍西征

長安少年唯好武金殿承恩爭破虜沙場烽
火隔天山鐵騎西征幾歲還戰處黑雲霾澣
海愁中明月度陽關玉笛聲悲離酌晚金方
路極行人遠計日霜戈盡敵歸迴首戎城空
落暉始笑子卿心計失徒看海上節髦稀

送脩武元少府

寸祿牽色養此行寧嘆息自矜黃綬采蘭時

不厭丹墀芳草色百戰荒城復井田幾家春
樹帶人煙黎甿久厭蓬飄苦遲爾西南惠月
傳

送崔十三東遊

千里有同心十年一會面當杯緩筭柱倏忽
催離宴丹鳳城頭噪晚鷗行人馬首夕陽斜
灞上春風留別袂關東新月宿誰家官柳依
依兩鄉色誰能此別不相憶

送鄔三落第還鄉

郢客文章絕世稀常嗟時命與心違十年失
路誰知己千思思親獨遠歸雲帆春水將何
適日愛東南暮山碧關中新月對離罇江上
殘花待歸客名宦無媒自古遲窮途此別不
堪悲荷衣垂釣且安命金馬招賢會有時

送馬明府赴江陵

陶令南行心自永江天極目澄秋景萬室遙
方犬不鳴雙鳧下處人皆靜清風高興得湖
山門柳蕭條雙翟閑黃花滿把應相憶落日

登樓北望還

送畢侍御謫居

崇蘭香死玉簪折志士吞聲甘徇節忠盡不
為明主知悲來莫向時人說滄浪之水見心
清楚客辭天淚滿纓百鳥喧喧噪一鷄上林
高枝亦難託寧嗟人世棄虞翻且喜江山得
康樂自憐黃綬老嬰身妻子朝來勸隱淪桃
花洞裏舉家去此別相思復幾春

送褚大落第東歸

離琴彈苦調美人慘向隅頃來荷策干明主
還復扁舟歸五湖漢家側席明敷久豈意遺
賢在林藪玉堂金馬隔青雲墨客儒生皆白
首昨夢芳洲採白蘋歸期且喜故園春稚子
只思陶令至文君不厭馬卿貧剡中風月又
相憶池上舊游應再得酒熟寧孤芳杜春詩
成不枉晴山色念此那能不羨歸上陽諫獵
事皆違他日東流一乘興知君為我掃荆扉

送傅管記赴蜀軍

終童之死誰繼出鷲領儒生今俊逸主將早
知鸚鵡賦飛書許載蛟龍筆峨眉玉壘指霞
標鳥沒天低幕府遙巴山雨色藏征旆漢水
猿聲咽短簫賜壁腰金應可料才略縱橫年
且妙無人不重樂毅賢何敵能當魯連嘯日
暮黃雲千里昏壯心輕別不銷魂勸君用却
龍泉劍莫負平生國士恩

行路難

君不見明星映空月太陽朝昇光盡歇君不

見凋零委路蓬長風飄舉入雲中由來人事
何常定且莫驕奢笑賤窮

盧龍塞行送韋掌記

雨雪紛紛黑山外行人共指盧龍塞萬里飛
砂咽鼓鼙三軍殺氣凝旌旆陳琳書記本翻
翩料敵張兵奪酒泉聖主好文兼好武封侯
莫比漢皇年

效古秋夜長

秋漢飛玉霜北風掃荷香含情紡織孤燈盡

拭淚相思寒漏長
簷前碧雲靜如水
月弔栖鳥啼鳥起
誰家少婦事鴛機
錦幕雲屏深掩扉
白玉窓中聞落葉
應憐寒女獨無衣

山中寄時校書

蓬萊紫氣溫如玉
唯予知爾陽春曲
別來幾日芳蓀綠
百花酒滿不見君
青山一望心斷續

哭曹鈞

苦節推白首
憐君負此生
忠盡名空立
家貧

道不行朝來相憶訪蓬蓽
只謂淵明猶卧疾
忽見江南弔鶴來
始知天上文星失常恨
知音千古稀
那堪夫子九泉歸
一聲鄰笛殘陽裏
酌酒空堂淚滿衣

錢考功集卷第四

五言律詩

奉和聖製登會昌山應制

睿想入希夷真遊到具茨玉鑿登嶂遠雲輅
出花遲泉壑凝神處陽和布澤時六龍多順
動四海正雍熙

省中對雪寄元判官拾遺昆季

萬點瑤臺雪飛來錦帳前瓊枝應比淨鶴髮
敢爭先散影成花月流光透竹煙今朝謝家

興幾處郢歌傳

山齋獨坐喜玄上人夕至

舍下虎溪徑煙霞入暝開柴門兼竹靜山月
與僧來心瑩紅蓮水言忘綠茗杯前峯曙更
好斜漢欲西迴

秋夜寄張韋二主簿

涼夜寒簾好輕雲過月初碧空河色淺松葉
雨聲虛道阻天難問機忘世易踈不知雙翠
鳳棲棘復何如

歸故山路逢隣居隱者

握手雲棲路潛然恨幾重誰知綠林盜長占
綵霞峰心死池塘草聲悲石逕松無因芳杜
月琴酒更相逢

落第劉拾遺相送東歸

不醉百花酒傷心千里歸獨收和氏玉還採
舊山薇出處離心盡榮枯會面稀預愁芳草
色一徑入衡闈

和劉七讀書

夜雨深館靜苦心黃卷前雲陰留墨沼螢影
傍華編夢鳥富青藻通經仍妙年何愁丹穴
鳳不飲玉池泉

早下江寧 鍾士精神做過

暮天微雨散涼吹片帆輕雲物高秋節山川
孤容情霜蘋唱楚水寒燕別吳城宿浦有歸
夢愁猿莫夜鳴

登復州南樓

孤樹延春日他山卷曙霞客心湖上鴈歸思

日邊花行李迷方久歸期涉歲賒故人雲路
隔何處寄瑤華

江陵晦日陪諸官泛舟

節物堪為樂江湖有主人舟行深更好山趣
久彌新罇酒平生意煙花異國春城南無夜
月長袖莫留賓

縣城秋夕

山城日易夕愁坐先掩扉俸薄不酤酒家貧
忘授衣露重蕙花落月冷沙鷄飛効拙慙無

補雲林歎再歸

秋夜梁七兵曹同宿二首

一笑不可得同心相見稀
摘菱頻貰酒待月未扃扉
星影低驚鵲蟲聲傍旅衣
早棲歲已晚共羨鴈南飛

好欲棄吾道今宵又遇君
老夫相勸酒稚子待題文
月下誰家笛城頭幾片雲
如何此幽興明日重離群

和萬年成少府寓直

赤縣新秋夜文人藻思催
鐘聲自仙掖月色近霜臺
一葉兼螢度孤雲帶鴈來
明朝紫書下應問長卿才

春夜過長孫繹別業

佳期難再得清夜此雲林
帶竹新泉冷穿花片月深
含毫凝逸思酌水話幽心
不覺星河轉山枝驚曙禽

題温處士山居

誰知白雲外別有綠蘿春
苔遶溪邊徑花深

洞裏人逸妻看種藥稚子伴垂綸頽上逃堯
者如何此養真

題陳季璧

郢人何苦調飲水仍布衾煙火晝不起蓬蒿
春欲深前庭少喬木隣舍聞新禽雖有徵賢
詔終傷不遇心

贈鄰居齊六司倉

沉冥衆所遺咫尺絕佳期始覺衡門下脩然
太古時鷄聲共林巷燭影隔茅茨坐惜牛羊

徑芳蓀白露滋

送征鴈

秋空萬里淨嘹唳獨南征風急翻霜冷雲開
見月驚塞長怯去翼影滅有餘聲悵望遙天
外鄉愁滿目生

宴鬱林觀張道士房

滅跡人間世忘歸象外情竹壇秋月冷山殿
夜鍾清仙侶披雲集霞杯達曙傾同歡不可
再朝暮赤龍迎

秋夕與梁錕文宴

客到衡門下林香蕙草時好風能自至明月
不須期秋月翻荷影晴霜脆柳枝留歡美清
夜寧覺曉鍾遲

哭空寂寺玄上人

悽然雙樹下垂淚遠公房燈續生前火爐添
沒後香陰階明片雪寒竹響空廊寂滅應爲
樂塵心徒自傷

題精舍寺

勝景不易遇入門神頓清房房占山色處處
分泉聲詩思竹間得道心松下生何時來此
地擺落世間情

開元觀遇張侍御

碧落忘歸處佳期不厭逢晚涼生玉井新暑
避煙松欲醉流霞酌還醒度竹鍾更憐琪樹
下歷歷見遙峰

和人秋歸終南山別業

舊居三顧後晚節重幽尋野徑到門盡山窓

連竹陰昔年鶯出谷今日鳳歸林物外凌雲
操誰能繼此心

故相國苗公挽歌

霸陵誰寵葬漢主念蕭何盛業留青史浮榮
逐逝波隴雲仍作雨薤露已成歌悽愴平津
閣秋風弔客過

酬劉員外雨中見寄

苦雨滴蘭砌淒風生葛衣潢汗三逕絕砧杵
四鄰稀分與玄豹隱不為湘燕飛慙君角巾

折猶肯問衡闈

賦得歸雲送李山人歸華山

秀色橫千里歸雲積幾重欲依毛女岫初卷
少夷峯蓋影隨征馬衣香拂卧龍牀應函谷
上真氣日溶溶

過裴長官新亭

茅屋多新意芳林昨試移野人知石路戲鳥
認花枝慢水縈蓬戶閑雲掛竹籬到家成一
醉歸馬不能騎

寄鄧州郎士元使君

龍節知無事江城不掩扉詩傳過客遠書到
故人稀坐嘯看潮起行春送鴈歸望舒三五
夜思盡謝玄暉

過長孫宅與朗上人茶會

偶與息心侶忘歸才子家玄談兼藻思綠茗
代榴花岸幘看雲卷含毫任景斜松喬若逢
此不復醉流霞

下第題長安客舍

不遂青雲望愁看黃鳥飛梨花度寒食客子
未春衣世事隨時變交情與我違空餘主人
柳相見却依依

陪考功王員外城東池亭宴

無雙錦帳即絕境有林塘鶴靜踈群羽蓮開
失衆芳晴山看不厭流水趣何長日晚催歸
騎鐘聲下夕陽

過孫員外藍田山居

不知香署客謝病翠微間去幄蘭將老辭車

雉亦閑近窓雲出洞當戶竹連山對酒溪霞
晚家人採蕨還

秋園晚沐

黃卷在窮巷歸來生道心五株衰柳下三逕
小園深倒薤翻成字寒花不假林麕眉謝群
彥獨酌且閑吟

窮秋對雨

晦日連苦雨動息更遑迴生事萍無定愁心
雲不閑翟門悲暝雀墨竈上寒苔始信宣城

守乘流畏曝腮

裴迪南門秋夜對月

夜來詩酒興月滿謝公樓影閉重門靜寒生
獨樹秋鶴驚隨葉散螢遠入煙流今夕遙天
末清光幾處愁

和蜀縣段明府秋城望歸期

製錦蜀江靜飛鳥漢闕遙一茲風靡草再視
露盈條旅望多愁思秋天更次寥河陽傳麗
藻清韻入歌謠

晚歸藍田酬王維給事贈別

早棲却得性每與白雲歸
徇祿仍懷橘看山
免採薇暮禽先去馬
新月待開扉霄漢時迴
首知音青鎖闈

再得畢侍御書聞巴中卧疾

芳信來相續同心遠更親
數重雲外樹不隔
眼中人夢寐花駢色
相思黃鳥春更聞公幹
病一夜二毛新

宿新里館

愁人待曉鷄秋雨暗淒淒
度燭螢時滅傳書
鴈漸低客來知計誤
夢裏泣津迷無以逃悲
思寒蟬處處啼

○谷口書齋寄楊補闕

泉壑帶茅茨雲霞生薜帷
竹憐新雨後山愛
夕陽時聞鷺樓常早秋
花落更遲家童掃蘿
徑昨與故人期

衡門春後

不厭晴林下微風度葛巾
寧唯北窓月自爲

上皇人叢篠輕新暑孤花占晚春寄言莊叟
蝶與爾得天真

題吳通微主人

食貧無盡日有願幾時諧長嘯秋光晚誰知
志士懷朝煙不起竈寒葉欲連階飲水仍留
我孤燈點夜齋

晚次宿預館

鄉心不可問秋氣又相逢飄泊方千里離悲
復幾重迴雲隨去鴈寒露滴鳴蛩延頸遙天

未如聞故國鍾

藍上茆茨期王維補闕

山中人不見雲去夕陽過淺瀨寒魚少叢蘭
秋蝶多老年踈世事幽性樂天和酒熟思才
子溪頭望玉珂

春夜寓直

養性慣雲卧爲郎如鳥棲不知仙閣峻惟覺
玉繩低帳喜香煙暖詩慙賜筆題未央春漏
促殘夢謝晨鷄

新昌里言懷

性拙偶從宦心閒多掩扉雖看北堂草不忘
舊山薇花月霽來好雲泉堪夢歸如何建章
漏催着早朝衣

秋夜寄袁中丞王員外

一夕盈千念方知別者勞衰榮難會面魂夢
暫同袍片月臨堦早清河度鴈高應憐蔣生
徑秋露滿蓬蒿

九日閒居寄登高數子

初服棲窮巷重陽憶舊遊門閒謝病日心醉
授衣秋酒盡寒花笑庭空暝雀愁今朝落帽
客幾處管絃留

晚入宣城界

斜日片帆陰春風孤客心山來指樵路岸去
惜花林海氣蒸雲黑潮聲隔雨深鄉愁不可
道浦宿聽猿吟

靜夜酬通上人問疾

東林生早涼高枕遠公房大士看心後中宵

清漏長驚蟬出暗柳微月隱迴廊何事沉痾
久含毫問藥王

奉陪使君十四叔晚憇大雲門寺

野寺千家外閒行晚暫過炎氛臨水盡夕照
傍林多境對知心妄人安覺政和繩牀搖塵
尾佳趣滿滄波

省中春暮酬嵩陽焦道士見招

朝花飛暝林對酒傷春心流年催素髮不覺
映華簪垂老遇知己酬恩看寸陰如何紫芝

客相憶白雲深

酬苗發員外宿龍池寺見寄

寧知待漏客清夜此從容暫別迎車雉還隨
護法龍香煙輕上月林嶺靜聞鐘郢曲傳甘
露塵心洗幾重

貞懿皇后挽詞

淑麗詩傳美徽章禮飾哀有恩加象服無日
祀高榭曉月孤秋殿寒山出夜臺通靈深眷
想青鳥獨飛來

歲初歸舊山酬寄皇甫侍御

欲知愚谷好久別與春還覺暖初歸樹雲晴
卻戀山石田耕種少野客性情閑求仲應難
見殘陽且掩關

鑿駕避狄歲別韓雲卿

白髮壯心死愁看國步移關山慘無色親愛
忽驚離影絕龍分劍聲哀鳥戀枝茫茫雲海
外相憶不相知

詠白油帽送客

薄質慙加首愁陰幸庇身卷舒無定日行止
必依人已沐脂膏惠寧辭雨露頻雖同客衣
色不染洛陽塵

藍上采石芥寄前李明府

淵明遺愛處山芥綠芳初翫此春陰色猶滋
夜雨餘隔溪煙葉小覆石雪花舒采采還相
贈瑤華信不如

送贊法師往上都

遠近化人天王城指日邊宰君迎說法童子

伴隨緣到處花爲雨行時杖出泉今宵松月下門閉想安禪

送沈少府還江寧

遠宦碧雲外此行佳興牽湖山入閭井鷗鳥
俛神仙斜日昔鄉樹春潮迎客船江樓新興
發應與政聲傳

送盧說擢第東遊

湖山不可厭東望有餘情片玉登科後孤舟
任興行月中嚴子瀨花際楚王城歲暮雲泉

鶴聞天更一鳴

送少微師西行

隨緣忽西去何日返東林世路寧嗟別空門
久息心人煙一飯少山雪獨行深天外猿啼
處誰聞清梵音

送崑山孫少府

徇祿近滄海乘流看碧霄誰知仙吏去宛與
世塵遙遠帆背歸鳥孤舟低上潮懸知訟庭
靜窓竹日蕭蕭

送屈突司馬克安西書記

制勝三軍勁澄清萬里餘星飛龐統驥箭發
魯連書海月低雲旆江霞入錦車遙知太阿
劍計日斬鯨魚

送時暹避難適荆南

三嘆把離袂七哀深我情雲天愁遠別豺虎
擁前程駐馬戀携手隔河聞哭聲相思昏若
夢淚眼幾時明

送邊補闕省覲

東去有餘意春風生賜衣鳳凰銜詔下才子
采蘭歸斟酒百花裏情人一笑稀別離須計
日相望在彤闈

錢考功集卷第五

五言律詩

送彈琴李長史往洪州

抱琴爲徹吏孤棹復南行
幾渡秋江水皆添白雪聲
佳期來客夢幽興緩王程
佐牧無勞問心和政自平

送宋徵君讓官還山

至人無滯跡謁帝復思玄
魏闕辭花綬春山有杏田
紫霞開別酌黃鶴舞離絃
今夜思君

夢遙遙入洞天

送陳供奉恩勅放歸覲省

得意今如此清光不可攀
臣心堯日下鄉思楚雲間
楊柳深歸棹芙蓉樓舊山
采蘭兼采錦何似買臣還

送外甥范勅赴任常州長史燕覲省

憐君展驥去能解倚門愁
就養仍榮祿還鄉即畫遊
橋花低客舍葦菜繞歸舟
與報垂綸叟知吾世網留

隴右送章三還京

隴右保在云

春風起東道握手望京關
柳色從鄉至鶯聲送客還
嘶驂顧近驛歸路出他山
舉目情難盡羈離矢志間

送元評事歸山居

憶家望雲路東去獨依依
水宿隨漁火山行到竹扉
寒花催酒熟山犬喜人歸
遙羨書窓下千峰出翠微

鍾子美得無下所必為述

送武進韋明府

理色想無事鳴琴不下堂
井田通楚越津市半漁商
蘆橘垂殘雨紅蓮折早霜
送君催白首臨水獨思鄉

送上官侍御

執簡朝方下乘輅去不除
感恩輕速道入幕比還家
碣石春雲色邯鄲古樹花
飛書報明主烽戍靜天涯

送郭秀才制舉下第南遊

矢志思浪跡知君晦近名
出關塵稍遠過鄧

興彌濃山盡溪初廣人間
舟自行探幽無旅思莫畏
楚猿鳴

送夏侯審校書東歸

楚鄉飛鳥沒獨與碧雲還
破鏡催歸客殘陽見舊山
詩成流水上夢盡落花間
儻寄相思字愁人定解顏

送衛功曹赴荆南

漢家仍用武才子晚成名
惆悵江陵去誰知魏闕情
碧雲愁楚水春酒醉宣城
定想褰帷

政還聞坐嘯聲

送馬使君赴鄭州

東土忽無事專城復任賢
喜觀班瑞禮還在
偃兵年膏雨帶榮水歸人
耕圃田遙知下車
日萬井起新煙

送郎四補闕東歸

無事共干世多時廢隱淪
相看戀簪組不覺
老風塵勸酒憐今別傷心
倍去春徒言樹萱
草何處慰離人

送陸三出尉

春草晚來色東門愁送君
盛才仍下位明代
負奇文且樂神仙道終隨
鴛鴦群梅生寄黃
綬不日在青雲

送安都秀才北還

年少工文客言離卻解顏
不嗟荆寶退能喜
綵衣還新月來前館高陽
出故關相思東北
望燕趙隔青山

送褚十二澡擢第歸吳觀省

林表吳山色詩人思不忘向家流水便懷橘
綵衣香滿酌留歸騎前程未夕陽愴茲江海
去誰惜杜蘅芳

送費秀才歸衡州

南望瀟湘渚詞人遠憶家客心隨楚水歸棹
宿江花不畏心期阻惟愁面會賒雲天有飛
翼方寸佇瑤華

送陸郎中

事邊仍戀主舉酒復悲歌粉署含香別轅門

載筆過鶯聲出漢苑柳色過漳河相憶情難
盡離居春草多

送僧歸日本

上國隨緣至來途若夢行浮天滄海遠去世
法船輕水月通禪觀魚龍聽梵聲惟憐一燈
影萬里眼中明

送楊暉擢第遊江南

行人臨去水新詠復新悲萬里高秋月孤山
遠別時掛帆嚴子賴酌酒敬亭祠歲宴無芳

杜如何寄所思

送田倉曹歸覲

竒絲絡驄馬去府望梁城節下趨庭出秋來
懷橘情別筵寒日晚歸路碧雲生千里相思
夜愁看新月明

送張管書記

邊華多勞役儒衣逐鼓鞞日寒關樹外峰盡
塞雲西河廣蓬難渡天遙鴈漸低班超封定
遠之子去思齊

送蕭常侍北使

絳節引雕戈鳴騶動玉珂戎城去日遠漢使
隔年多鴈宿常連雪沙飛半度河明光朝即
邇秋社早成歌

送李棲桐道舉擢第還鄉省侍

幾年深道要一舉過賢關名與玄珠出鄉宜
晝錦還蓮舟同宿浦柳岸向家山欲見寧親
孝儒衣稚子斑

送柳道士

去世能成道遊仙不定家歸期千歲鶴行邁
五雲車海上春應盡壺中日未斜不知相憶
處琪樹幾枝花

送陸侍御使新羅二首

衣冠周柱史才學我鄉人受命辭雲陛傾城
送使臣去程滄海月歸思上林春始覺儒風
遠殊方禮樂新

萬里三韓國行人滿目愁辭天使星遠臨水
澗霜秋雲佩迎仙島虹旌過蜃樓定知懷魏

闕迴首海西頭

送虞說擢第南歸覲省

南風起別袂心到衡湘間歸客楚天遠孤舟
雲水間愛君采蘭處花鳥連家山得意且寧
省人生能幾還

送陸贄擢第還蘇州

鄉路歸何早雲間喜擅名思親盧橘熟帶雨
客帆輕夜火臨津驛晨鐘隔浦城華亭養仙
羽計日再飛鳴

送原公南遊

有意蕪程去飄然二翼輕故鄉多久別春草
不傷情洗鉢泉初暖焚香曉更清自言難解
縛何日伴師行

送萬兵曹赴廣陵

秋日思遠客臨流語別離楚城將坐嘯郢曲
有餘悲山晚桂花老江寒蘋葉衰應須揚
意更誦長卿詞

送李判官赴桂州幕

欲知僊道貴縫掖見諸侯且感千金諾寧辭
萬里遊鴈峰侵瘴遠桂水出雲流坐惜離居
晚相思綠蕙秋

賦得寒雲輕重色送子恂入京

無限寒雲色蒼茫淺更深從龍如有瑞捧日
不成陰積翠全低嶺虛明半出林帝鄉遙在
目鐵馬又駸駸

賦得叢蘭曙後色送梁侍御入京

曙色傳芳意分明錦繡叢蘭生露後日花發

夜來風不向三峰裏全勝一縣中遙知大苑
內應待五花駘

賦得餘冰送李中丞之浙西

曉日餘冰上春池一鏡明多從履處薄偏向
飲時清比雪光仍在因風片不成更隨舟楫
去猶可助堅貞

賦得浦口望斜月送皇甫判官

起見西樓月依依向浦斜動搖生淺浪明滅
照寒沙水渚猶疑雪梅林不辨花送君無可

贈恃此代瑤華

賦得綿絲思遠道送岑判官入嶺

極目煙霞外孤舟一使星興中尋白雪夢裏
過滄溟夜月松江戍秋風竹塢亭不知行遠
近芳草日青青

江寧春夜裴使君送蕭員外

花院日扶疎江雲自卷舒主人熊軾任歸客
雉門車曙月稀星裏春煙紫禁餘行看石頭
戍記得是南徐

送薛八謫居

東水將孤客南行路幾千虹翻潮上雨鳥落
瘴中天謫去寧留恨思歸豈待年銜杯且一
醉別淚莫潸然

送衡陽歸客

歸客愛鳴榔南征憶舊鄉江山追宋玉雲雨
憶荆王醉裏宜城近歌中郢路長憐君從此
去日夕望三湘

送員外侍御入朝

別思亂無緒妖氛猶未清含香五夜客持賦
十年兄霜拂金波樹星迴玉斗城自憐江上
鶴垂翅羨飛鳴

送李諫議歸荊州

歸舟同不繫織草剩忘憂禁掖曾通籍江城
舊列侯暮帆依夏口春雨夢荊州何日朝雲
陞隨君拜冕旒

送元中丞江淮轉運

薄稅歸天府輕徭賴使臣歡沽賜帛老恩及

卷綃人去問殊官俗來經幾劫春東南卸亭
上莫問有風塵

送唐別駕赴郢州

少年從事好此去別愁輕滿坐詩人興隨君
郢路行蒹葭侵驛樹雲水抱山城遙愛下車
日江皋春草生

送鄭巨及第後歸覲

多才白華子初擅桂枝名嘉慶送歸客新秋
帶雨行離人背水去喜雀近家寧別贈難爲

此衰年畏後生

宿遠上人蘭若

香花閉一林真士此看心行道白雲近燃燈
翠壁深梵筵清水月禪坐冷山陰更說東溪
好明朝乘興尋

酬元祕書晚出藍溪見寄

野興引才子獨行幽徑遲雲留下山處鳥靜
出溪時拙宦不忘隱歸休常在茲知音儻相
訪炊黍掃茆茨

別張起居

有別時留恨銷魂况在今風濤初振海鷓鷀
各辭林舊國關河絕新秋草露深陸機嬰世
網應負故山心

郭司徒廳夜宴

秋堂復夜闌舉目盡悲端霜堞鳥聲苦更樓
月色寒美人深別意斗酒少留歡明發將何
贈平生雙玉盤

初至京口示諸弟

還家百戰後訪故幾人存兄弟得相見榮枯
何處論新詩添卷軸舊業見兒孫 平生
事焉能 門

月下洗藥

汲井向新月分流入衆芳濕花低桂影翻葉
醉泉光露下添餘潤蜂驚引暗香寄言養生
客采采共提筐

晚春未寧墅小園獨坐寄上王相公

東閣一何靜鶯聲落日愁夔龍暫爲別昏旦

思兼秋蕙草出籬外花枝寄竹幽上方傳雅
頌七夕讓風流

歲暇題茅茨

谷口逃名處歸來遂野心薄田供歲酒喬木
待新禽溪路春雲重山厨夜火深桃源應漸
好仙客許相尋

九日登玉山

霞景青山上誰知此勝遊龍沙傳往事菊酒
對今秋步石隨雲起題詩向水流忘歸更有

處松下片雲幽

宴崔駙馬玉山別業

金榜開青鎖驕奢半隱淪玉蕭惟送酒羅袖
愛留賓竹館煙催暝梅園雪悞春滿朝詞賦
客盡是入林人

春谷幽居

黃鳥鳴園柳新陽改舊陰春來此幽興宛是
謝公心掃逕蘭芽出添池山影深虛名隨振
鷺安得夕棲林

賦得池上覆丁香樹

得地移根遠交柯遶指柔露香濃結桂池影
闕蟠虬黛葉輕筠綠金花笑菊秋何如南海
外雨露隔炎洲

題樊川杜相公別業

數畝園林好人知賢相家結茅書閣儉帶水
槿籬斜古樹生春蘚新荷卷落花聖恩加玉
鉉安得卧青霞

酬盧十一過宿

乞還方未遂日夕望雲林况復逢青草何勞
問此心閉門公務散枉策故情深遙夜他鄉
宿同君梁甫吟

崔十四宅問候

曉日早鶯啼江城旅思迷微官同寄傲移疾
阻招攜遠水間閩內青山雉堞西王孫莫久
卧春草欲萋萋

山路見梅感而有作

莫言山路僻還被好風催行客淒涼過村籬

冷落開晚溪寒水照晴日數蜂來重憶江南
酒何因把一杯

詠門上畫松上元王杜三相公

昔聞生澗底今見起毫端衆草此時沒何人
知歲寒豈能裨棟宇且欲出門闌只在丹青
筆凌雲也不難

早發東陽

信風催過客早發梅花橋數鴈起前渚千艘
爭便潮將隨浮雲去日惜故山遙惆悵煙波

末佳期在碧霄

舟中寄李起居

南行風景好晷旦水泉閑春色郢中樹晴霞
湖上山去家旅帆遠迴首暮潮還蕙草知何
贈故人雲漢間

夜雨寄寇校書

秋館煙雨合重城鍾漏深佳期阻清夜孤興
發離心燭影出綃幕蟲聲連素琴此時蓬閣
友應念昔同衾

喜李侍御拜郎官入省

粉署花駘入丹霄紫誥垂直廬驚漏近賜被
覺霜移漢主前瑤席穰侯許鳳池應憐後行
鴈空羨上林枝

蘇端林亭對酒喜雨

小雨飛林頂浮涼入晚多能知留客處偏與
好風過濯錦翻紅藥跳珠亂碧荷芳罇深幾
許此興可酣歌

見上林春鴈翔青雲因寄楊起居李

員外

上林春更好賓鴈不知歸顧影憐青籞傳聲
入紫微夜陪池露宿朝出苑花飛寧憶寒鄉
侶鸞凰一見稀

偶成

含毫意不淺微月上簾櫳門靜吏人息心閑
囹圄空繁星入踈樹驚鵲倦秋風始覺牽卑
劇宵眠亦在公

漁潭值雨

日入林島異鶴鳴風草間孤帆泊枉渚飛雨
來前山客意念留滯川途忽阻艱赤亭仍數
里夜待安流還

題蕭丞小池

鶯鳴蕙草綠朝與情人期林沼忘言處鴛鴻
養翻時春泉滋藥暖晴日度花遲此會無辭
酒良辰難再追

錢考功集卷第五



錢考功集卷第六

五言排律

送集賢崔八叔承恩括圖書

雨露滿儒服天心知予虛還勞五經笥更訪
百家書贈別傾文苑光華比使車曉雲隨客
散寒樹出關疎相見應朝夕歸期在玉除

送張五員外東歸楚州

纓珮不爲美人群寧免辭香然黃鵠去未負
白雲期此別清興盡高秋臨水時好山枉帆



僻浪跡到家遲他日詔書下梁鴻安可追

閑居寄包何

去名即棲遁何必歸滄浪種藥幽不淺杜門
喧自忘林眠多曉夢鴉散驚初陽片雪幽雲
至迴風隣果香佳期碧天末惆悵紫蘭房

津梁寺尋李侍御

禪林絕過客柱史正焚香馴鴿不猜隼慈雲
能護霜驄聲隔暗竹吏事散空廊霄漢期鴛
鷺狐狸避憲章逸堦春色至屈草待君芳

山園秋晚寄杜黃裳少府

惆悵佳期阻林園秋景閑終朝碧雲外唯見
暮禽還泉石思携手煙霞不閉關杖藜仍把
菊對卷也看山望望離心起非君誰解顏

東谿社野人致酒

萬重雲樹下數畝子平居野院羅泉石荆扉
背里間早冬耕鑿暇弋鴈復烹魚靜掃寒花
徑唯邀傲吏車晚來留客好小雪下山初

憶山中寄舊友

數歲白雲裏與君同採薇樹深煙不散溪靜
鷺忘飛更憶東巖趣殘陽破翠微院中花下
醉洗藥月前歸風景今還好如何此興遣

東臯早春寄郎四校書

雜言五字句初

祿微賴學稼歲起歸衡茆窮達戀明主耕桑
亦近郊夜來霽山雪陽氣動林梢南蕙暖初
吐春鳩鳴欲巢蓬萊時入夢知子憶貧交

玉山東溪題李叟屋壁

霞景已斜照煙溪方暝投山家歸路僻轍跡

亂泉流野老采薇暇蝸廬招客幽磨農突荒
阮鷓鴣步閒疇偶此愜真性令人輕宦遊

溫泉宮禮見

新豐佳氣滿聖主在溫泉雲暖龍行處山明
日馭前順風求至道側席問遺賢靈雪瑤墀
降晨霞綵懸滄溟不讓水庇賤也朝天

遊襄陽泉石晚歸

遊目隨山勝迴棹愛浦長往來幽不淺昏旦
興難忘木末看歸翼蓮西失夕陽人聲指閭

雜言五字句初
六句意從亦字
卷出

井野趣惜林塘稍近垂楊路菱舟擁岸香

夏日陪史郎中宴杜郎中果園

何事重逢迎春醪晚更清林端花自老池上月初明路入仙郎次烏連柱史名竹陰踈柰苑山翠傍蕪城引滿不辭醉風來待曙更

南溪春耕

荷簑趨南逕戴勝鳴條枚溪雨有餘潤土膏寧厭開溝塍落花盡耒耜度雲迴誰道耦耕倦仍兼勝賞催日長農有暇悔不帶經來

省試湘靈鼓瑟

善鼓雲和瑟常聞帝子靈馮夷空自舞楚客不堪聽苦調淒金石清音入杳冥蒼梧來怨慕白芷動芳馨流水傳瀟浦悲風過洞庭曲終人不見江上數峰青

觀法駕自鳳翔迴

攙槍一掃滅閭闔九重開海晏鯨鯢盡天旋日月來聖情蘇品物龍馭闢雲雷暗漏移僊仗朝陽出帝臺周慙散馮出禹讓濬川迴欲

識封人願南山舉酒杯

題玉山村叟壁

建三帖書中有題神有全地

谷口好泉石居人能陸沉牛羊下山小煙火
隔雲深一徑入溪色數家連竹陰截虹辭晚
雨鷲隼落殘禽涉趣皆流目將歸羨在林却
思黃綬事辜負紫芝心

縣中池竹言懷

官小志已足時清免負薪卑棲且得地榮耀
不關身自愛賞心處叢篁流水湄荷香度高

枕山色滿南隣道在即爲樂機忘壺厭負却
愁丹鳳詔來訪漆園人

山園極隱

守靜信推分灌園樂在茲且忘堯舜力寧顧
尚書期晚景采蘭暇空林散帙時卷荷藏露
滴黃口觸蟲絲三徑與蠶遠一瓢常自怡情
人半雲外風月詎相思

送王諫議任東都居守

車徒鳳掖東去去洛陽宮斲以青蒲隔還看

紫禁同經過乘雨露瀟灑出鴛鴻官署名臺
下雲山舊苑中暮天雙闕靜秋月九重空且
喜成周地詩人播國風

送鄭書記

決勝無遺策辭天似請纓出身唯徇死報國
且能兵受命麟麒殿參謀驃騎營短簫催別
酒斜日駐前旌義勇千夫敵風沙萬里行幾
年丹闕下侯印錫書生

送族姪赴任

林下不成興仲容微祿牽客程千里遠別念
一帆懸欲歎卑棲去其如勝趣偏雲山深郡
郭花木淨潮田坐嘯帷應下離居月復圓此
時知小阮相憶綠樽前

長安落第作

始願今如此前途復若何無媒獻詞賦生事
日蹉跎不遇張華識空悲竊戚歌故山歸夢
遠新歲客愁多刷羽思喬木登龍恨失波散
才非世用迴首謝雲蘿

酬長孫繹藍溪寄杏

愛君藍水上種杏近成田拂逕清陰合臨流
彩實懸清香和宿雨佳色出晴煙懿此傾筐
贈相知懷橘年芳馨來滿袖瓊玖願酬篇把
玩情何極雲林若眼前

藥堂秋暮

隱來未得道歲去愧雲松茅屋空山暮荷衣
白露濃唯憐石苔色不染世人蹤潭靜宜孤
鶴山深絕遠鍾有時丹竈上數點綵霞重勉

事壺公術仙期待赤龍

哭常徵君

萬化一朝盡窮泉悲此君如何丹竈術能誤
紫芝焚不遂蒼生望空留封禪文遠年隨逝
水真氣盡浮雲山閉龍蛇蟄林寒麋鹿群傷
心載酒地仙菊爲誰薰

送鮑中丞赴太原軍營

年壯才仍美時來道易行寵兼三獨任威肅
貳師營將略過南仲天心寄北京雲旂臨塞

色龍笛出關聲漢月隨霜去邊塵計日清漸
知王事好文武用書生

奉送劉相公江淮催轉運

國用資戎事臣勞為主憂將徵任土貢更發
濟川舟擁傳星還去過池鳳不留唯高飲水
節稍淺別家愁落葉江
知謝公興微月在江樓

山海上秋遙

送李秀才落第遊荆

羽翠雖成夢遷鶯尚後群名迭郗詵策興發

謝玄文昏旦扁舟去江山幾路分江潮吞海
日歸鴈出湖雲詩思應須苦猿聲莫厭聞離
居見新月那得不思君

奉陪郭常侍宴滄川山池

掖垣攜愛客勝地賞年光向竹過賓館尋山
到妓堂歌聲掩金谷舞態出平陽地滿簪裾
影花添蘭麝香鶯啼春未老酒冷日猶長安
石風流事須歸問省郎

寇中送張司馬歸洛

戎狄寇周日衣冠適洛年
客亭新驛騎關路
舊人煙吾道將東矣
秋風更颯然雲愁百戰
地樹隔兩鄉天旅思蓬飄
陌鷺魂鴈怯弦今
朝一尊酒莫惜醉離筵

奉和宣城張太守南亭秋夕懷友

池館蟪蛄聲梧桐秋露晴
月臨朱戟靜河近
畫樓明捲幔浮涼入
聞鍾未夜清片雲懸曙
斗數鴈過秋城羽扇揚
風暇瑤琴悵別情江
山飛麗藻謝朓讓前名

過山人所居因寄諸遺補

空谷春雲滿愚公晦跡深
一隨玄豹隱幾換
綠蘿陰絕徑人稀到
芳蓀我獨尋厨煙住峭
壁酒氣出重林蝴蝶晴
還舞黃鸝晚暫吟所
思青瑣客瑤草寄幽心

過鳴皋隱者

磻石老紅蘚徵君卧幾年
飛泉出林下一徑
過崖巔鷄犬逐人靜
雲霞宜地偏終朝數峰
勝不遠一壺前仲月霽
春雨香風生藥田丹

溪不可別瓊草色芊芊。

送揚銷歸隱

悔作掃門事還吟招隱詩今年芳草色不失
故山期遙想白雲裏采苓春日遲溪花藏石
徑巖翠帶茆茨九轉莫飛去三迴良在茲還
嗤茂陵客貧病老明時

酬劉起居卧病見寄

承顏看彩服不覺別丹墀味道能忘病過庭
更學詩繚垣多畫戟遠岫入書帷竹靜携琴

處林香讓果時聲同叨眷早交淡在年衰更
枉兼金贈難爲繼組詞

陪南省諸公宴殿中李監宅

將門高勝霍相子寵過韋宦貴攀龍後心傾
待士時壺觴開雅宴鴛鷺眷相隨舞退燕姬
曲歌徵謝眺詩晚鍾過竹靜醉客出花遲莫
惜留餘興良辰不可追

山齋讀書寄時校書杜叟

日愛蘅茝下閑觀山海圖幽人自守朴窮谷

也名愚隔嶺和溪雨新泉到戶樞叢蘭齊稚
子蟠木老潛夫憶戴差過剡遊仙慣入壺濠
梁時一訪莊叟亦吾徒

晚歸藍田舊居

雲捲東皋下歸來省故蹊泉移憐石在林長
覺原低舊里情難盡前山實未迷引藤看古
木嘗酒呪春鷄興與時髦昔年將野老齊才
微夕陽退應得遂霞棲

太子李舍人城東別業與二三文友

逃暑

下馬失炎暑重門深綠篁宮臣禮嘉客林表
開蘭堂茲夕興難盡澄壘照墨塲東陵晚來
好目極趣何長鳥道掛疎雨人家殘夕陽城
隅擁歸騎留醉戀瓊芳

寄袁州李嘉祐員外

誰謂江山阻心親夢想偏容輝常在目離別
任經年郡國通流水雲霞共遠天行春鸞幾
轉遲客月頻圓鴈有還鄉羽人無訪戴船願

徵黃霸入相見玉階前

禁闈翫雪寄薛左丞

玄雲低禁苑飛雪滿神州
虛白生臺榭寒光入冕旒
粉凝宮壁淨乳結洞門幽
細遶風轉輕隨落羽浮
怒濤堆砌石新月孕簾鉤
爲報詩人道豐年頌聖猷

春暮過石龜谷題溫處士林園

隱几無名老何年
此陸沉丘園自得性
婚嫁不嬰心
歲計因山薄
霞棲在谷深
設置連草

色曬藥背松陰觸興雲生岫
隨耕鳥下林
搯願笑來客
頭上有朝簪

宿畢侍御宅

交情頻更好子有古人風
晤語清霜裏平生苦節同心
惟二仲合室乃一瓢空
落葉寄秋菊愁雲低夜鴻
薄寒燈影外殘漏雨聲中
明發南昌去迴看御史驄

中書過雨

濟旱惟宸慮爲霖
即上台雲銜七曜起
雨拂

九門來綸閣飛絲度龍渠激霽迴色翻池上
藻香裊鼎前杯湘燕皆舒翼沙鱗豈曝腮尺
波應萬假虞海載沿洄

適楚次徐城

去家隨旅鴈幾日到南荆行邁改鄉邑苦辛
淹晦明畏途在滌雨未暮息趨程窮木對秋
館寒鴉愁古城迷津坐爲客對酒默含情感
激念知己匣中孤劍鳴

經李蒙穎陽舊居

同心而早世天道亦何論獨有山陽宅平生
永不諼青溪引白鳥流涕弔芳蓀蔓草入空
室叢篁深毀垣舊遊還在眼神理更忘言唯
見東山月人亡不去門

贈漢陽隱者

當年不出世知子食霞人樂道復安土遺榮
長隱身衡茅古林曲秔稻清江濱桂棹爲漁
暇荷衣禦暑新款顏在行役幽興惜今晨分
首天涯去再來芳杜春

巨魚縱大壑

巨魚縱大壑遂性似乘時奮躍風生鬣騰凌
浪鼓鰭龍據回地軸鯤化想天池方映吞舟
意光殊在藻嬉傾危嗟暮燕隱晦誦泥龜喻
士逢明主才猷得所施

錢考功集卷第六

錢考功集卷第七

五言排律

送李九歸河北

文武資人望，謀猷簡聖情。
南州初卧鼓，東土復維城。
寄重分符去，威仍出闕行。
斗牛移八座，日月送雙旌。
別戀瞻天起，仁風應物生。
行聞收組練，劍玉會承明。

送丁著作佐台郡

多年金馬客，名遂動歸輪。
佐郡紫書下，過門

朱紱新揚舲望海嶽入境背風塵水驛偏乘
月梅園別受春帶經臨府吏鱸鯉偶鄉人始
見美高士逍遙在搢紳

送王使君赴太原行營

太白明無象皇威未戢戈諸侯持節鉞千里
控山河漢驛雙旌度胡沙七騎過驚蓬連鴈
起收馬入雲多不賣雲龍塞能消滌海波須
傳出師頌莫奏式微歌

送王使君移鎮淮南

共許徐方牧能臨河內人郡移棠轉茂車至
鹿還馴吏事嘉師旅鴛行惜縉紳別心傾祖
席愁望盡征輪紫詔徵黃晚蒼生借寇頻願
言青瑣拜早及上林春

李四勸爲尉氏尉李士勉爲開封尉

美政惟兄弟時人數俊賢皇枝雙玉樹吏道
二梅仙自理堯唐俗唯將禮讓傳采蘭花萼
聚就日鴈行聯黃綬俄三載青雲未九遷廟
堂爲宰制幾日試龍泉

春夜宴任六昆季宅

際晚綠煙起入門芳樹深不才叨下客喜宴
齒諸簪夜月仍携妓清風更在林彩毫揮露
色銀燭動花陰自接通家好因知待士心向
隅逢故識茲夕願披襟

閑居酬張起居見贈

在林非避世守拙自離群弱羽謝風水窮愁
依典墳良知不遐棄新詠獨相聞能使幽興
苦坐忘清景曛前山帶喬木暮鳥聯歸雲向

夕野人思難忘騎省文

奉和王相公秋日戲贈元校書

才妙心仍遠名跡迹可追清秋聞禮瑕新雨
到山時勝事唯愁盡幽尋不厭遲弄雲憐鶴
去隔水許僧期賢相敦高躅雕龍亦所思芙
蓉洗清露願比謝公詩

過楊駙馬亭子

衣冠在漢臺榭接天成彩鳳翻簫曲祥鱣
入館名歌鍾芳月暗林瘴碧雲生亂水歸潭

淨高花映竹明退朝追宴樂開閣醉簪纓長
袖留嘉客樓烏下禁城

山下別杜少府

把手意難盡前山日漸低情人那暫別夕鳥
尚同棲寸晷戀言笑佳期欲阻睽離雲愁出
岫去水咽分溪莊叟幾虛說楊朱空目迷傷
心獨歸路秋草更萋萋

晚出青門望終南別

能清謝眺思暫下承明廬
不
斷山下寒皋

微雨餘更憐歸鳥去宛到卧龍居笑指叢林
上閑雲自卷舒寧知鳴鳳日却憶釣鱸初處
貴有餘興伊周位不如

送嚴士良侍奉詹事南遊

疏傳獨知止曾參善愛親江山侍行邁長幼
出囂塵握手想千古此心能幾人風光滿長
陌草色傍征輪日夕望荆楚鶯鳴芳杜新漁
煙月下淺花嶼水中春點翰遙相憶含情向
白蘋

題祕書王迪城北池亭

子喬來魏闕明主賜衣簪從宦辭人事同塵
即道心還追大隱跡寄此鳳城陰昨夜新煙
雨池臺清且深伏泉通粉壁迸筍出花林晚
沐常多暇春醪時獨斟西南漢宮月復對綠
窓琴

過王舍人宅

入門花柳暗知是近臣居大隱心何遠高風
物自踈翛然靜者事宛得上皇餘鷄犬偷仙

藥兒童授道書清吟送客後微月上城初綵
筆有新詠文星垂太虛承恩金殿宿應薦馬
相如

過瑞龍觀道士

不知誰氏子鍊魄家洞天鶴待成丹日人尋
種杏田靈山含道氣物性皆自然白鹿顧瑞
草驪龍蟠玉泉得茲象外趣便割區中緣石
甯采雲母霞堂陪列仙主人善止客柯爛忘
歸年

送沈冲

天璞非外假至人常晏如心期邈霄漢詞律
響瓊琚舉酒常歎息無人達子虛夜光失隋
掌驥駟伏蓋車考室晉山下歸田秦歲初寒
雲隨路合落照下城餘千里還同述無勞怨
索居

和韋侍御寓直對雨

名貫四科首班宜二妙齊如何厭白簡未得
步金閨寓直晦秋雨吟餘聞遠鷄漏聲過栢

冷雲色向窓低誰謂霄漢近翻嗟心事睽蘭
滋人未握霜曉鶚還栖佇見田郎字親勞御
筆題

奉和聖制登朝元閣

六合紆玄覽重軒啓上清石林飛棟出霞頂
太階平拂曙鑿輿上晞陽瑞雪晴翠微迴日
馭丹轡駐天行御氣升銀漢垂衣俯錦城山
通玉苑迥河抱紫關明感物乾文動凝神道
化成周王陟喬嶽列辟讓英聲

奉和杜相公移長興宅奉呈元相公
守貴常思儉平津此意深能卑丞相宅何謝
故人心種蕙初抽帶移篁不改陰院梅朝助
鼎池鳳夕歸林覺路經中得滄洲夢裏尋道
高仍濟代恩重豈投簪報國誰知己推賢共
作霖興來文雅振清韻擲雙金

送任先生任唐山丞

再命果良願幾年勤說詩上公頻握髮才子
共垂帷琢玉成良器出門偏愴離腰章佐墨

綬耀錦到茆茨樹老見家日潮平歸縣時衣
催蓮女織頌聽海人詞鴻鵠志應在荃蘭香
未衰金門定回首雲路有佳期

送外甥懷素上人歸鄉侍奉

釋子吾家寶神清慧有餘能翻梵王字妙盡
伯英書遠鶴無前侶孤雲寄太虛狂來輕世
界醉裏得真如飛錫離鄉久寧親喜臘初故
池殘雪滿寒柳霽煙踈壽酒還嘗藥晨餐不
薦魚遙知禪誦外徒筆賦閑居

送張中丞赴桂州

出守求人瘼推賢動聖情紫臺初下詔皂蓋
始專城寵借飛霜簡威加却月營雲衢降五
馬林水引雙旌夙仰敦詩禮嘗聞偃甲兵戍
樓雲外靜訟閣竹間清化佇還珠美心將片
玉貞寇恂朝望重計日謁承明

送王相公赴范陽

翊聖銜恩重頻年按節行安危皆報國文武
不緣名受脤仍調鼎為霖更洗兵幕開丞相

閣旗總貳師營料敵知無戰安邊自有征代
雲橫馬首燕鴈拂笳聲去鎮關河靜歸看日
月明欲知瞻戀切遲暮一書生

送蔣尚書居守東都

鳳輦幸秦久周人侯帝情若非君敏德誰鎮
洛陽城前席命才彥舉朝推令名綸言動北
斗職事守東京鄭履下天去遽輪滿路聲出
關秋樹直對闕遠山明肅肅保釐處水流官
苑清長安日四笑朝夕袞衣迎

送李兵曹赴河中

能荷鍾鼎業不矜紈綺榮侯門王事後儒服
一書生昔志學文史立身為士英驪珠難隱
耀皋鶴會長鳴體命且隨牒候時當振纓寒
蟬思關柳匹馬向蒲城秋日黯將暮黃河如
欲清黎人思坐嘯知子樹佳聲

罷官後酬元校書見贈

心期悵已阻交道復何如自我辭丹闕唯君
到弊廬未忘金馬詔猶負茂陵書鄰犬吠初

服家人愁斗儲秋堂入閒夜雲月思離居窮
巷聞砧冷荒枝映鵲踈宦名隨落葉生事感
枯魚流水仍揮手知音未棄余

同鄔戴關中旅寓

文士皆求遇今人誰至公靈臺一寄宿揚柳
再春風更惜忘形友頻年失志同羽毛齊燕
雀心事阻鴛鴻暫滯慙歸養飛鳴恨觸籠橘
懷鄉夢裏書去客秋中殘雪迷歸鴈韶光棄
斷蓬吞悲問唐舉何路出屯蒙

新豐主人

明代少知已夜光頻暗投迤邐終薄命動息
盡窮愁自欲歸飛鷁當爲不繫舟雙垂素絲
淚幾弊皂貂裘暮鳥棲幽樹孤雲出舊丘蛩
悲衣褐夕雨暗轉蓬秋客裏馮諼劍歌中甯
戚牛主人能縱酒一醉且忘憂

陪郭常侍令公東亭宴集

盛業山河列重名劔履榮珥貂爲相子開閣
引時英美景池臺色佳期宴賞情詞人載筆

至仙妓出花迎暗竹朱輪轉回塘玉珮鳴舞
衫招戲蝶歌扇隔啼鶯飲德心皆醉披雲興
轉清不悲懽樂盡積慶在和羹

夕遊覆釜山道士觀因登玄元廟

冥搜過物表洞府次溪旁已入瀛洲遠誰言
仙路長孤煙出深竹道侶正焚香鳴磬愛山
靜步虛宜夜涼仍同象帝廟更上紫霞崗霽
月懸琪樹明星映碧堂傾思丹竈術願采玉
芝房儻把浮丘袂乘雲別舊鄉

栢崖老人號無名先生男削髮女黃

冠自以雲泉獨樂命予賦詩

古也憂婚嫁君能樂性腸長男棲月宇少女
核覺棠問爾食霞處春山芝桂旁鶴前飛九
轉壹裏駐三光與我開龍嶠披雲靜藥堂胡
麻兼藻綠石髓隔花香帝力言何有椿年喜
漸長官然高象外寧不做羲皇

贈李十六

鍾子美詩話入律高推此選定之妙

半面喜投分數年欽盛名常思夢顏色誰意

訪柴荆忽聽款扉響欣然倒屣迎蓬蒿駐騶
馭鷄犬傍簪纓酌水即嘉宴新知甚故情僕
夫視日色棲鳥催車聲自爾宴言後至今門
館清何當更乘輿林下已蒼生

裴僕射東亭

鳳泉任匡濟雲溪難退還致君起列辟得道
在榮班朱戟繡垣下高齋芳樹間隔花開遠
水廢卷愛晴山晚沐值清興知音同解顏籍
蘭開賜酒留客下重關仙犬逐人靜朝車映

竹間則知真隱逸未必謝區寰軒后三朝顧
赤松何足攀

中書王舍人輞川舊居

幾年家絕壑滿徑種芳蘭帶石買松貴通溪
漲水寬誦經連谷響吹律減雲寒誰謂桃源
裏天書問考槃一從解蕙帶三入偶蟬冠今
夕復何夕歸休尋舊歡片霞隔蒼翠春雨半
林湍藤長穿松蓋花繁壓藥闌景深青眼下
興接彩毫端笑向同來客登龍此地難

送襄陽盧判官奏開河事

千里趨魏闕一言簡聖聰河流引關外國用
贍秦中有詔許其策隨山興此功連雲積石
阻計日安波通飛棹轉年穀利人勝歲豐言
歸漢陽路拜首逢萊宮紫殿賜衣出青門酣
酌同晚陽過微雨秋水見新鴻坐惜去車遠
愁看離館空因思郢川守南楚滿清風

奉送戶部李郎中充晉國副節度出

塞

德位調梅用忠輸擊虜年子房推廟畧漢主
記兵權受命榮中禁分麾鎮左賢風生黑山
道星下紫微天始願文經國俄看武定邊鬼
方堯日遠幕府代雲連汗馬將行矣盧龍已
肅然關防驅使節花月卷離筵自忝知音選
而令感義偏淚聞橫吹落心逐去旌懸常念
夔能政時須說濟川勞還應即爾朝暮玉墀
前

奉和中書常舍人晚秋集賢院即事

文星垂太虛辭伯綜群書彩筆下鴛掖褒衣
來石渠典墳探奧旨造化覩權輿述聖魯宣
父通經漢仲舒窓明宜縹帶地肅近丹除清
晝刪詩暇高秋作賦初露盤侵漢聳宮柳度
鷗疎靜對連雲閣晴聞過闕車舊僚云出矣
晚歲復何如海嶠瞻歸路江城夢直廬含毫
思兩鳳望遠寄雙魚定笑巴歌拙還參麗曲
餘

和范郎中宿直中書曉翫新池贈南

省同僚西坦補遺

青墳留才子春池靜禁林自矜仙島勝死在
掖垣深引派彤庭裏含虛玉砌陰漲來知聖
澤清處見天心蘭氣飄紅岸星文動碧潯鳳
樓長近日虬卧欲爲霖席籠雖高位流謙乃
素襟焚香春漏盡假寐曉鸞吟丹地直清切
朝陽復照臨司言秉逸趣鼓興接知音六義
驚擣藻三臺響擲金爲憐風水外落羽此漂
沉

錢考功集卷第七

錢考功集卷第八

七言律詩

同程九早入中書

漢家賢相重英奇蟠木何材也見知不意雲
霄能自致空驚鷓鴣忽相隨臘雪初明栢子
殿春光欲上萬年枝獨慙皇鑒明如日未厭
螢光向玉墀

仲春宴王補闕城東山池

王孫興至幽尋好芳草春深景氣和藥院愛

隨流水入山齋喜與白雲過懶嫌巢鶴窺人
遠不厭叢花對客多醉來倚玉無餘事目送
歸鴻笑復歌

夜宿靈臺寺寄郎士元

西日橫山令碧空東方吐月滿禪宮朝瞻雙
頂青冥上夜宿談天色界中石潭倒映蓮花
水塔院空聞松栢風萬里故人能尚爾知君
視聽我心同

題郎士元半日吳村別業兼呈李長

官

半日吳村帶晚霞閑門高柳亂飛鷗橫雲嶺
外千重樹流水聲中一兩家愁人昨夜相思
苦閏月今年春意賒自歎梅生頭似雪却憐
潘令縣如花

猷川雪後送蔡上人還京時因避世

卧疾

連步青溪幾萬重有時共立在孤峰齊到孟
空食麥雪經傳金字坐雲松呻吟獨卧猷川

水振錫先聞長樂鍾迴望群山携手處離心

一一涕無從

和李員外扈駕幸溫泉宮

未央月曉度疎鍾鳳輦時巡出九重雪霽山
門迎瑞日雲開水殿候飛龍輕寒不入宮中
樹佳氣常薰仗外峯遙羨枚臯扈僊蹕偏承
霄漢涯恩濃

長信怨

長信螢來一葉秋蛾眉淚盡九重幽鴝鵒觀

前明月度芙蓉闕下絳河流鴛鴦久別難為
夢鳳管遙聞更起愁誰念昭陽夜歌舞君王
玉輦正淹留

送河南陸少府

雲間陸生美且竒銀章朱綬映金羈自料抱
才將致遠益嗟趨府暫牽卑東城社日催巢
燕上苑秋聲散御梨朝夕詔書還栢署行看
飛隼集高枝

送李評事赴潭州使幕

湖南遠去有餘情
蘋葉初齊白芷生
謾說簡書催物役
遙知心賞緩王程
興過山寺先雲到
嘯引江帆帶月行
幕下由來貴無事
佇聞談笑靜黎甞

送李九貶南陽

玉柱金罍醉不歡
雲山驛道向東看
鴻聲斷續暮天遠
柳影蕭疎秋日寒
霜降幽林霑蕙若
弦驚翰苑失鴛鸞
秋來迴首君門阻
馬上應歌行路難

送裴頔侍御使蜀

杜史纔年四十強
鬚髯玄髮美清陽
朝天繡服乘恩貴
出使星輶滿路光
錦水繁華添麗藻
峨眉眉明月引飛
觴多才自有雲霄
望計日應追鴛鷺行

送韋信愛子歸覲

維舟解纜到斜暉
春水東流北鴈飛
才子學詩趨露冕
棠花含笑待班衣
稍聞江樹啼猿近
轉覺山林過客稀
借問還珠盈合浦
何如

鯉也入庭闈

送興平王少府遊梁

舊室相逢情更親攀權甚少捨離頻黃綬罷
來多遠客青山何處不愁人日斜宮樹聞蟬
蛻雨過關城見月新梁國遺風重詞賦諸侯
應念馬卿貧

說
補

送張員外出牧岳州

鳳凰銜詔與何人善政多才寵寇恂臺下鴛
鸞半送遠岳陽雲樹待行春自吟黃閣知音

吟
作
悔

在不厭形檐出守頻應笑馮唐衰且拙世情
相見白頭新

送孫十尉溫縣

飛花落絮滿河橋千里傷心送客遥不惜芸
香染黃綬惟憐鴻羽下青霄雲衢有志終驥
首吏道無媒且折腰急管繁絃催一醉頽陽
不駐引征鑣

送鍾評事應宏詞下第東歸

芳歲歸人嗟轉蓬含情回首霸陵東蛾眉不

入秦臺鏡鷁羽還驚宋國風
世事悠揚春夢裏年光寂寞
旅愁中勸君稍盡離筵酒
千里佳期難再逢

送嚴維尉河南

蕙葉青青花亂開少年趨府下
蓬萊甘泉未厭楊雄賦吏道
何榮賈誼才征陌獨悲飛蓋
遠離筵只惜暝鍾催欲知別
後相思處願植瓊枝向栢臺

送馬員外拜官覲省

二十爲師事漢文鵷雛驥子
自爲群筆精已許臺中妙劍
術還令世上聞歸覲屢驚槐
里月出師常笑棘門軍莫言
來往朝天遠看取鳴鞘入斷
雲

送冷朝陽擢第後歸金陵

萊子晝歸今始好潘園景色
夏偏濃夕陽流水吟詩去明
月青山出竹逢兄弟相歡初
讓果鄉人爭賀舊登龍佳期
少別俄千里雲樹遙看歷幾
重

九日宴浙江西亭

詩人九日憐芳菊筵啓高齋宴浙江漁浦浪花搖素壁西興樹色入秋窓木奴向熟懸金寶桑落新開瀉玉釭四子醉時爭講習笑論黃霸舊為邦

和晴雪早朝

紫微晴雪帶恩光統仗偏隨鷓鷯行長信凡留寧避曉宜春花滿不飛香獨看積素凝清禁已覺輕寒讓太陽題柱盛名兼絕唱風流

誰繼漢田郎

避暑納涼

木槿花開畏日長時搖輕扇倚繩牀初晴草蔓緣新笋頻雨苔衣染舊墻十旬河朔應虛醉八柱天台好納涼無事始知偏靜勝深垂紗帳詠滄浪

早朝

鍾傳清禁纔應徹漏報仙闈儼已開雙闕薄煙籠菡萏九成初日照蓬萊朝時但向丹墀

拜仗下疑從碧落迴聖代逍遙更何事願將
巴曲贊康哉

題焦道士石壁

三

畔碧堂縣錦里真人此得仙玉體纔

魚雨霓裳欲向大羅天彩雲不散燒丹

白鹿時藏種玉田幸入桃源因去世方期

冊訣一延年

題延州聖僧穴

定力無涯不可稱未知何代坐禪僧默默山

門宵閉月熒熒石室晝燃燈四時樹長書經
葉萬歲崑懸柱杖藤昔日捨身緣救鵠今時
出見有飛鷹

樂遊園晴望上中書李侍郎

爽氣朝來萬里清憑高一望九愁輕不知鳳
沼霖初霽但覺堯天日轉明四野山河通遠
色千家砧杵共秋聲遙想青雲丞相府何時
開閣引書生

幽居春暮書懷

自哂鄙夫多野性貧居數畝半臨湍溪雲雜
雨來茆屋山雀將雛到藥欄仙籙滿牀閑不
厭陰符在篋老羞看更憐童子宜春服花裏
尋師指杏壇

謁許由廟

故向箕山訪許由林泉物外自清幽松上掛
瓢枝幾變石間洗耳水空流綠苔唯見遮三
徑青史空傳謝九州緬想古人增歎息嗚然
雲樹滿巖秋

過張成侍御宅

丞相幕中題鳳人文章心事每相親從軍誰
謂仲宣樂入室方知顏子貧杯裏紫茶香代
酒琴中綠水靜留賓欲知別後相思意唯願
瓊枝入夢頻

酬考功楊員外見贈佳句

上林諫獵知才薄尺組承恩愧命牽潢潦難
滋滄海潤螢光空盡太陽前虛名濫接登龍
士野性寧忘種黍田相國無私人守朴何辭

老去上皇年

寄永嘉王十二

永嘉風景入新年才子詩成定可憐
夢裏還鄉不相見天涯憶戴復誰傳
花傾曉露垂如淚鶯拂遊絲斷若絃
願得迴風吹海鴈飛書一宿到君邊

七盤路阻寇聞李端公先到南楚

日暮窮途淚滿襟雲天南望羨飛禽
阮腸暗與孤魂斷江水遙連別恨深
明月既能通憶

夢青山何用隔同心秦楚眼看成絕國
相思一寄白頭吟

酬趙給事相尋不遇留贈

誰意顏生窮巷裏能勞馬跡破春苔
忽看童子掃花處始愧夕郎題鳳來
斜景適隨詩興盡好風纔送珮聲迴
豈無鷄黍期他日惜此殘春阻綠杯

山中酬楊補闕見過

日暖風恬種藥時紅泉翠壁薜蘿垂
幽溪鹿

過苔還靜深樹雲來鳥不知青瑣同心多遠
興春山載酒遠相隨却慙身外牽纓冕未勝
杯前倒接羅

同王銷起居程浩郎中韓翊舍人題
安國寺用上人院

慧眼沙門真遠公經行冥坐有儒風香緣不
絕簪裾會禪想豈妨藻思通曙後爐煙生不
滅晴來階色並歸空狂夫入室無餘事唯與
天花一笑同

尋司勳李郎中不遇

知己知音同舍郎如何咫尺阻清陽每恨兼
葭倚芳樹多慙新燕入華堂重花不隔陳蕃
榻脩竹能深夫子墻唯有早朝趨鳳闕朝時
憐羽接鴛行

贈張南史

紫泥何日到滄洲笑向東陽沈隱侯黛色晴
峯雲外出穀文江水縣前流使臣自欲論公
道才子非關賦薄遊溪畔秋闌雖可佩知君

不得少停舟

暇日覽舊詩因以題詠

逍遙心地得關關偶被功名浼我閑有壽亦
將歸象外無詩兼不戀人間何窮默識輕洪
範未喪斯文勝大還筐篋靜開難似此藥珠
春色海中山

漢武出獵

漢家無事樂時邕羽獵年年出九重玉帛不
朝金闕路旌旗長統綵霞峯且貪原獸輕黃

屋寧畏漁人犯白龍薄暮方歸長樂觀垂楊
幾處綠煙濃

宴曹王宅

賢王駟馬退朝初小苑三春帶雨餘林沼葱
龍多貴氣樓臺隱映接天居仙鷄引敵穿紅
藥宮燕銜泥落綺疏自歎平生相識願何如
今日廁應徐

重贈趙給事

久飛鴛掖出時髦耻負平生稽古勞玉樹滿

庭家轉貴雲衢獨步位初高能迂騶馭尋蝸
舍不惜瑤華報木桃應念潛郎守貧病常悲
休沐對蓬蒿

贈闕下裴舍人

二月黃鶯飛上林春城紫禁曉陰陰長樂鍾
聲花外盡龍池柳色雨中深陽和不散窮途
恨霄漢常懸捧日心獻賦十年猶未遇羞將
短髮對華簪

登劉賓客高齋

能以功成踈寵位不將心賞負雲霞林間客
散孫弘閣城上山宜綺季家蝴蝶晴連池岸
草黃鸝晚出柳園花日陪鯉也趨文苑誰道
門生隔絳紗

哭辛霽

流水辭山花別枝隨風一去絕還期昨夜故
人泉下宿今朝白髮鏡中垂音徽寂寂空成
夢容範朝朝無見時旦暮餘生幾息在不應
存歿未嘗悲

和慕容法曹尋漁者寄城中故人
孤煙一點綠溪湄漁父幽居即舊基
鷺鷥不驚收釣處閑麋應乳負暄時
茅齋對雪開罇好稚子焚枯飯
客遲勝事宛然懷抱裏頃來
新得謝公詩

錢考功集卷第八

錢考功集卷第九

五言絕句

江行無題一百首

傾酒向漣漪乘流欲去時寸心同尺璧投此
報馮夷

江曲全縈楚雲飛半自秦峴山迴首望如別
故關人

浦煙含夜色冷日轉秋旻自有沉碑在清光
不照人

楚岸雲空合楚城人不來抵今誰善舞莫恨

廢草臺

行背青山郭吟當白露秋風流無屈宋空誅

古荊州

晚來漁父喜曾重欲收遲恐有長江使金錢

願贖龜

去指龍沙路徒懸象魏心夜涼無遠夢不為

偶聞砧

霽雲疎有葉雨浪細無花穩放扁舟去江天

自有涯

好日當秋半層波動旅腸已行千里外誰與

共秋光

潤色非東里官曹吏建章宦遊難自定來喚

權船郎

夜江清未曉徒惜月光沉不是因行樂堪傷

老大心

翳日多喬木維舟取東薪靜聽江叟語俱是

厭兵人

箭漏日初短汀煙草木衰雨餘雖更綠不是
采蘋時

山雨夜來漲喜魚跳滿江岸沙平欲盡垂蓼
入船窓

渚邊新鴈下舟上獨淒涼俱是南來客憐君
綴一行

雲密連江暗風斜着物鳴一杯真戰將笑爾
作愁兵

柳拂斜開路籬邊數戶村可能還有意不掩

向江門

不識相如渴徒吟子美詩江清唯獨看心外
更誰知

牽路沿江狹沙崩岸不平盡知行處險誰肯
載時輕

憔悴異靈均非讒作逐臣如逢漁父問未是
獨醒人

水涵秋色靜雲帶夕陽高詩癖非吾病何妨
吮短毫

帶舟維古岸還似阻西陵箕 無多少迴頭
詎不能

秋雲久無雨江燕社猶飛却笑舟中客今年
未得歸

帆翅初張處雲鵬怒翼同莫愁千里路自有
到來風

佳節雖逢菊浮生正似萍故山何處望荒岸
小長亭

月下江流靜村荒人語稀鷺鴛雖有伴仍共

影雙飛

斗轉月未落舟行夜已深有村知不遠風便
數聲貼

棹驚沙鳥迅飛濺夕陽波不顧魚多處應防
一目羅

行到楚江岸蒼茫人正迷祗如秦塞遠格磔
鷓鴣啼

漸覺江天遠難逢故國書可能無往事空食
鼎中魚

岸草連荒色村聲樂稔年晚晴貪獲稻間却採菱船

灘淺多游鷺江清易見魚怪來吟未足秋物欠江渠

蛩響依沙飛透水煙夜涼誰詠史空泊運租船

睡穩葉舟輕風微浪不驚任君蘆葦岸終夜動秋聲

自念平生意曾期一郡符可知因謫宦班鬢

入江湖

水天涼夜月不是少清光好景隨人物秦淮憶建康

古來多思客搖落恨江潭今日秋風至蕭疎過沔南

映竹疑村好穿蘆覺渚幽漸安無曠土薑芋當農收

煙渚復煙渚畫屏休畫屏引愁天末去數點暮山青

秋風動客心寂寂不成吟飛上危檣立啼鳥
報好音

見底高秋水開懷萬里天旅吟還有伴沙柳
數枝蟬

九日自佳節扁舟無一杯曹園舊尊酒戲馬
憶高臺

兵火有餘燼貧村纔數家無人爭曉渡殘月
下寒沙

渚禽菱茨足不向稻梁爭靜宿涼灣月應無

失侶聲

輕雲未撲霜樹杪橘初黃行是知名物微風
過水香

土曠深耕少江平遠釣多生平皆弃本金革
竟如何

海月非常物不可尋披沙應有地淺處
定無金

風晚冷颼颼蘆花已白頭舊來紅葉寺堪憶
玉京秋

渺渺望天涯清漣浸赤霞難逢星漢使烏鵲
日乘查

風好來無陣雲閑去有宗釣歌無遠近應喜
罷鰲幢

吳疆連楚甸楚俗異吳鄉謾把罇中物無人
喙蟹筐

岸綠野煙遠江紅斜照微撐開小魚艇應到
月明歸

雨餘江始漲漾漾見流薪曾歎溝中木斯言

憶古人

墜露晚猶濃秋風不易逢涉江雖已晚高樹
攀芙蓉

葉舟維夏口煙野獨行時不見頭陀寺空懷
幼婦碑

晚泊武昌岸津亭踈柳風數株曾手植好事
憶陶公

舟航依浦定星斗滿江寒若比陰霾日何妨
夜未闌

近戍離金落孤岑望火門唯將知命意瀟灑
向乾坤

叢菊生隄上此花長後時有人還採掇何必
有春期

夕景殘霞落秋寒細雨晴短纓何用濯舟在
月中行

堤壞漏江水地坳成野塘晚荷人不折留取
作秋香

失宦終何路摠懷亦自寬襞牋嘲白鷺無意

喻梟鸞

樓空人不歸雲似去時衣黃鶴無心下長應
笑令威

白帝朝驚浪陽臺暮映雲等閒生險易世路
秣如君

櫓慢生輕浪帆虛帶白雲客船雖狹小容得
瘦將軍

靜看秋水風微浪漸平人間馳競處塵土
自波成

風借帆方疾風回棹却遲較量人世事不校
一毫釐

咫尺愁風雨匡廬不可登祇疑香霧窟猶有
六朝僧

風雨正甘寢雲寬忽晚晴放歌須自遣一歲
又崢嶸

幽思正遲遲沙邊濯弄時自憐非博物猶未
識鳧葵

曾有煙波客能歌西塞山落帆唯待月一釣

紫菱灣

千頃水紋細一拳嵐影孤君山寒樹綠曾過

洞庭湖

光闊重湖水低斜遠鴈行未曾無興詠多謝

沈東陽

日落長亭晚山門步障青可能無酒分更祝

有旗星

晚菊遶江壘忽如開古屏莫言時節過白日

有餘馨

秋寒鷹隼健逐雀下雲空知是江湖客無心
擊塞鴻

遠岸無行樹經霜有伴紅停船搜好句題葉
贈江楓

江草何多思冬青尚滿洲誰能驚鵬鳥作賦
為沙鷗

身世比行舟無風亦暫休敢言終破浪唯願
穩乘流

數畝蒼苔石煙濛鶴卵洲定因詞客過名字

始風流

幽懷念煙水長恨隔龍沙今日滕王閣分明

見落霞

興閑停桂楫路好過松門不負佳山水還開
酒一尊

短檝休敲桂孤根自駐萍自憐非劍氣空向

斗牛星

江流何渺渺懷古獨依依漁父非賢者蘆中
但有磯

高浪如銀屋江風一發時筆端降太白才大
但終奇

細竹漁家路晴陽看結罾喜來邀客坐分與
折腰菱

幸有煙波興寧辭筆硯勞緣情無怨刺却似
反離騷

平湖五百里江水想通波不奈扁舟去其如
決計何

數峯雲斷處去岸映西山身到章江日猶應

未得閒

一鸞斜照水三板順風船未敢相邀約勞生
祇自憐

江雨正霏微江村晚渡稀何曾妨釣艇更待
得魚歸

沙上獨行時吟高到楚祠難將垂岬蓼盈把
當江籬

新野舊樓名潯陽勝賞情照人長一色江月
共淒清

潯陽江畔菊應似古來秋爲問幽樓客吟時
得酒不

願飲西江水那吟北渚愁莫教留滯跡遠比
蔡昭侯

湖口分江水東流獨有情當時好風物誰爲
伴宣城

高峰有佳號千尺倚寒風若使鑪煙在猶應
爲上公

萬木已清霜江邊村事忙故谿黃稻熟一夜

甕中香

楚水苦縈迴征帆落又開可緣非直路却有
好風來

遠謫歲時晏暮江風雨寒仍愁繫舟處驚夢
近長灘

錢考功集卷第九

錢考功集卷第十

五言絕句

送李明府去官

謗言三至後直道歎何如今日藍溪水無人
助夜漁

赴章陵酬李卿贈別

一官叨下秩九棘謝知音芳草文園路春愁
滿別心

逢俠者

燕趙悲歌士相逢劇孟家寸心言不盡前路
日將斜

喜郎員外見尋不遇

軒騎來相訪漁樵悔晚歸更憐垂露跡花裏
點牆衣

過故李侍御宅

不見承明客愁聞長樂鐘馬卿何早世漢主
欲登封

宿洞口館

野竹通溪冷秋泉入戶鳴亂來人不到芳草
上階生

九日寄姪彘箕等

採菊偏相憶傳香寄便風今朝竹林下莫使
桂尊空

梨花

艷靜如籠月香寒未逐風桃花徒照地終被
笑妖紅

題崔逸人山亭

藥徑深紅蘚山窓滿翠微
羨君花下醉蝴蝶
夢中飛

登臺

望山登春臺目盡趣難極
晚景下平阡花際
霞峯色

板橋

靜宜樵隱度遠與車馬隔
有時行藥來喜遇
歸山客

石井

片霞照仙井泉底桃花紅
那知幽石下不與
武陵通

古藤

引蔓出雲樹垂綸覆巢鶴
幽人對酒時苔上
閑花落

晚歸鷺

池上靜難馱雲間欲去晚
忽背夕陽飛乘興
清風遠

洞僊謔

幾轉到青山數重度流水秦人入雲去知向
桃源裏

藥圃

春畦生百藥花葉香初霽好客似光風偏來
入叢蕙

石上苔

淨與溪色連幽宜松雨滴誰知古石上不染
世人跡

窓裏山

遠岫見如近千里一窓裏坐來石上雲乍謂
壺中起

竹間路

暗歸草堂靜半入桃源去有時載酒來不與
清風遇

竹嶼

幽鳥清連上興來看不足新篁壓水低昨夜
鴛鴦宿

砌下泉

穿雲來自遠激砌流偏駛能資庭戶幽更引
海禽至

戲鷗

乍依菱蔓聚盡向蘆花減更喜好風來數片
翻晴雪

遠山鍾

風送出山鍾雲霞度水淺欲知聲盡處鳥滅
寥天遠

東陂

永日興難忘掇芳春陂曲新晴花枝下愛此
苔水綠

池上亭

臨池構杏梁待客歸煙塘水上褰簾好蓮開
杜若香

銜魚翠鳥

有意蓮葉間瞥然下高樹擘波得潛魚一點
翠光去

石蓮花

幽石生芙蓉百花慙美色遠笑越溪女聞芳
不可識

潺溪聲

亂石跳素波寒聲聞幾處颼颼暝風引散出
空林去

松下雪

雖因朔風至不向瑤臺側唯助苦寒松偏明
後凋色

田鶴

田鶴望碧霄無風亦自舉單飛後片雪早晚
及前侶

南陂

家住鳳城南門臨古陂曲時憐上林鴈半入
池塘宿

七言絕句

送崔山人歸山

東山殘雨掛斜暉野客巢由指翠微別酒稍
酣乘興去知君不羨白雲歸

題禮上人壁畫山水

連山畫出映禪寮粉壁香煙滿翠微坐來爐
氣縈空散共指晴雲向嶺歸

送歐陽子還江華郡

江華勝事接湘濱千里湖山入興新才子思
歸催去棹汀花且為駐殘春

暮春歸故山草堂

谷口殘春黃鳥稀辛夷花盡杏花飛始憐幽
竹山窓下不改清陰待我歸

訪李卿不遇

畫戟朱樓映晚霞高門寒柳度飛鷗門前不
見歸軒至城上愁看落日斜

與趙莒茶讌

竹下忘言對紫茶全勝羽客醉流霞塵心洗
盡興難盡一樹蟬聲片景斜

故王維右丞堂前芍藥花開悽然感

懷

芍藥花開出舊闌春衫掩淚再來看主人不

在花長在更勝青松守歲寒

送張參及第還家

太學三年聞琢玉東堂一舉早成名借問還家何處好玉人含笑下機迎

夜泊鸚鵡洲

月照溪邊一罩蓬夜聞清唱有微風小樓深巷敲方響水國人家在處同

春郊

水遶冰渠漸有聲氣融煙塢晚來明東風好

作陽和使逢草逢花報發生

歸鴈

瀟湘何事等閑回水碧沙明兩岸苔二十五弦彈夜月不勝清怨却飛來

晚歸嚴明府題門

降士林霑蕙草寒弦驚翰苑失鴛鸞秋中廻首君門阻馬上應歌行路難

秋夜送趙冽歸襄陽

斗酒忘言良夜深紅萱露滴鵲驚林欲知別

後思今夕漢水東流是寸心

送符別駕還郡

驥足駸駸吳越間
屏星復與紫書還
已知從事元無事
城上愁看海上山

同王員外隴城絕句

三軍版築脫金刀
黎庶翻慙將士勞
不意新城連嶂起
唯驚畫角入雲高

過故洛城

故城門前春日斜
故城門裏無人家
市朝欲

認不知處漠漠野田空
草花

校獵曲

長楊殺氣連雲飛
漢主秋畋正掩圍
重門日晏紅塵出
數騎胡人獵獸歸

晚過橫灞寄張藍田

亂水東流落照時
黃花滿徑客行遲
林端忽見南山色
馬上還吟陶令詩

九日田舍

今日吾家野興偏
東籬黃菊映秋田
浮雲曠

鳥飛將盡始達青山新月前

錢功集卷第十終

母

錢考功集卷第十終

